

雪橋詩話餘集

卷之六

Blank area containing faint bleed-through text from the reverse side of the page.

雪橋詩話餘集卷第六

遼陽楊鍾羲撰集

吳興劉承幹參校

致齋相國有嘉樂堂詩集已未上元夜獄中對月云夜色明如許嗟余困不伸百年原是夢廿載枉勞神室暗難挨曉牆高不見春星辰環冷月縲絀泣孤臣對景傷前事懷才誤此身餘生料無幾空負九重仁其夫人馮以戊午二月前卒夢堂相國孫女也子潤圃居士尙十公主生於乙未之燕九日猶及見夢堂嘉慶己巳追和曾外祖乙未詠雪詩韻云昔逢織女笑握手袖纔舉天

帝忽赫怒謫罰墮紱綺懵然如達生
曉嘶淚似雨支幹
加縶縛欲坐不能起茫茫人海中
太倉增一黍瞑臥悟
前因恍焉知所止靈覺性以寄形骸
體斯委從茲逞識
神紛綸炫奇傀時被魔障牽
惟將定慧倚少壯志遠大
羨鵬九萬里豈料風浪惡
顛蹶忽今此靜念平生遇
可悲復可喜人事福難希
天爵力堪取坦蕩率吾真
康莊何所阻但傷忠孝心
無能萬一補他時返故鄉
眷屬應倒屣重逢寶蓮華
燦敷功德水永劫奉君親
方完吾願耳潤圃以庚午卒
無子其叔父宣勇伯和琳故塋
照公爵所建己未後不敢復用
別遷劉村卽以此地爲潤

圃瑩兆思元主人輓詩復爲序其延禧堂詩鈔潤圃嘗
賜爵貝勒四開袂袍黃帶紫韉至是飾終典禮仍視上
公以見 仁宗之恩威並用而潤圃守身知命亦足多
云

杭州童鹿庵少失怙其母撫孤守節不下樓者十有五
年邵二雲修府志採其事以表苦節朱青湖爲作樓居
吟云江干老屋樓三楹以木支柱防欹傾童母守節子
未立家無儲粟空瓶罌鄰有老嫗亦早寡惻惻都是孤
寒者爲言苦節當同貞一居樓頭一樓下牀前設靈帷
牀後然土竈鎮日坐樓頭樓下跡如掃驕陽當窗欲爍

金我心如雪暑不侵北風中人欲砭骨我身如松凍不
折夜來獨對青松孤呼兒攤書依坐隅頻縫阿母手中
線爲憐兒體寒無襦一女襁褓泣呱呱中宵遺溺相叫
呼敲冰濯遺冰刺膚十指龜坼血糝糊起視鑪中宿火
無兒呻母吟聲淚俱獨茹荼苦十五載吾友始得爲通
儒嗚呼此節誰能如

合浦李符清載圍以癸卯孝廉試吏保定屢宰望縣翁
覃溪題其海門詩鈔有時和不識賦役繁數卷殘謙自
料理我攜邱侯墨囊物來與李生書笥比之句智伯墓
云晉陽宮殿已成塵終古荒墳傍水濱畢竟愛才知國

士趙亡無復報仇人

甘獻巖自號干一叟有風子之目身後著作散佚鐵冶

亭爲之蒐輯乾隆戊申除英德尉留別京師諸友詩有

飽噉離支之語時翁覃溪視學江西以詩冊寄懷道出

南昌有話別詩云檠戟清門後詞章北地雄凌寒催叱

馭垂老倚征篷樹色鄰江右川光接嶺東銜杯問詩思

先說荔支紅我昔磨崖字周夔說道難五谿寒舊翠萬

古碧秋瀾坡老題名在南山剔蘚看端應獻巖子一獻

響飛湍舊雨新知感楓亭荔渚旁人懷荆萼舍謂冶亭

學帖話玉煙堂海甯陳君他日蘇齋夢拈花臘雪香海

天迴紫氣星斗聚南昌

漢軍王佑郊弼齋以舉人出令長樂邑試拔梁芷鄰爲
前茅芷鄰詩詎有梯榮具容登角藝場受知從此始初
地豈能忘終效羊公舞深慙陸氏莊呼空何以報遺愛
滿吳航亦閩中循吏也

劉松嵐東昌舟次寄兄云節候幾更移多年嗟遠離最
難遣愁處將欲到家時問友多新墓看花少故枝祇餘
江上月猶爲照深卮送青城劉明府歸通州云行色少
光輝身貧馬不肥宦囊賸吟卷民淚貯征衣落日歸程
暮寒山秋葉飛到家應閉戶接見世人稀法梧門所謂

清詩味得李少鶴者也先官廣西後官奉天陳燮堂題
其集有度遼更過十三山之句柳江上流通黔江山狹
勢逼易衝決乾隆甲辰五月江瀾驟溢勢危甚立水中
三晝夜督民衛護水愈猛乃矯提軍令傳六營將備集
兵三千有奇奮勇搶救城得無恙有長歌紀其事與黃
仲則不相識己酉識其友施雪帆於嶺外讀仲則詩十
餘首心爲之傾又七年客吳下得吳會英才集亦非全
本乃至都謁翁覃溪乃見鈔本八卷嘉慶丙辰再來都
下請於覃溪爲付梓亦風雅好事矣邊袖石謂高密派
上者規摹長江武功下者刻畫江湖四靈漁洋尊唐實

則波靡於元明高密亦尊唐實則皮傅乎殘宋此可爲
依傍門戶不克自拔者箴而於漁洋高密無軒輦也

高宗朝彭文勤供奉內廷者數十年劉金門受業彭門
文勤倚之若左右手入翰林後不二年卽超升學士凡
大著作無不與聞嘉慶五年清明祭 裕陵金門以講

臣預扈從尋擢太常卿 仁宗諭掌院學士曰劉某已

出衙門可令以卿職仍帶講官值駐蹕桃花寺日薄暮
宣至宮門閱軍報畢卽將獲賊事增敘入上陵祝文擬
二聯曰繹係兇渠已鼠窮於齧線鶻穿賊子更狼走而
伏槍絕禮辛鎮之炊愁聞泣釜斫何甲渠之馬僞獲影

纓續持咒獻賊句下頃刻譯進蒙獎敏速其館課哈密
瓜賦文勤愛賞之屬書便面而蕉雪爲之圖文勤題句
有西抹東塗廿年事老夫當讓一頭看之句瑤華主人
見而和之復畫一箒索金門書賦一通瑤華詩云崖蜜
嘗時臘正寒可能祛暑貯冰盤玉堂賦出三都雪芳潤
圖將素箒看宗匠千年席不寒尙書聲價果槃槃今朝
衣鉢傳能者豈與歐蘇兩等看

金門遣戍黑龍江有集杜三卷北征二百十首之五云

木雜古今樹千山空自多雪崖纔變石塞水不成河

集窩

中年久木多變石

巧刮造化窟青看雨露柯猶含棟梁具生長

漫婆娑不見石與土

平埜皆沙塹無片土寸石管子所謂五塼

秋沙亦少泥

野人甯得所物理直難齊有客過茅宇清風獨杖藜古

苔生迨地須汝故相攜黃雀抱野粟驚呼熱中腸馬嘶

思故櫪鳥影度寒塘

布特哈諸城市馬每秋至聞黃豆辨兒雀聲輒馳歸故處

所向

無空闊追蹤恨渺茫喚人看驪裏吾亦離殊方羌父豪

豬帽煖蒙貂鼠裘食恩慙鹵莽供給愍誅求

索倫以打牲為業身

足五尺者人徵貂皮一每楚勒罕時至軍府納貢貂餘聽市易向苦所司苛索近則生計日充快馬金

纏轡真珠絡臂鞞忽看皮寢處談笑覓封侯

冬夏皆皮服人最驍

勇以從征立功名為樂

立降鹵兼千帳摧鋒皆絕倫射飛曾縱控嗜

酒見天真岌業土囊口參差虎穴鄰小兒強解事手自

與金銀鄂倫春居山野易物不信手拈得奇趣橫生非用銀錢或飲之酒輒得

杜詩爛熟安能辦此

朱阿顛早游牂牁夜郎間浮洞庭涉湘漢兵防水利瞭
若指掌奇麗川中丞官貴州廉使時爲治刑名麗川有
臂上眉痕刀上雪用之不錯是英雄之句阿顛亟稱之
寄中丞詩回憶昔年依幕府知公心跡是良臣常將國
事爲家事偏愛詩人及酒人因避權門欣失馬欲拯災
戶竟批鱗伊誰疆吏能如此禍福無關肯致身主客蓋
至相得也曾平反大獄一夕出死罪七人吳枚庵云
阿顛感懷云家臨越女東來水人在夜郎西去山魚梁

江云江從獨樹腹中出人在兩山頭上行留別王笛浦
云銅鼓山前木葉殘圖甯關外暮雲寒可憐一片江南
月祇在天厓馬上看北門橋怨云風急城頭落木哀寒
鷓盡處夕陽開生憎一夜空江雨迸出秋聲萬里來山
行口號云翠色迎人雲外落泉聲挂雨樹中鳴夜郎山
色如圖畫忘卻天厓萬里行皆黔中作也其論詩不規
往迹抒寫襟靈子西山孝廉秉其教爲吳門後七子翹

楚

甲秀樓在貴陽城南浮玉樓上鄂文端平定諸苗立鐵
柱以旌武功乾隆丁酉朱阿顛之大方適陳星河招飲

甲秀樓不果往卻寄云城南幽勝接郊圻百尺樓高擁
翠微兩岸碧移春水動萬山青挾暮雲飛風香入座知
花綻日影沈林見鳥飛好景人生難再遇滿櫟相賞竟
相違可以見沙洲九眼二水中浮之勝

吉林自設學校以科甲起家者自乾隆丁未進士馬維
馭惺庵始嘗以部員奉旨從軍出守淮安著有詩稿荆
南雜感云五溪蠻雨溼林昏曾擁貔貅十萬屯鼓嘯直
教穿戰壘鳥飛不敢度轅門陣雲暮起侵帷幄山月高
懸伴酒尊說劒談兵成往事而今贖得敝裘溫山城歡
峯峙峰頭繞郭人家處處樓鳥道千盤難策馬峽飛幾

折不通舟蠻煙慘淡昏如墨宦況清貧冷似秋我正摩
厓懷健筆欲隨定遠覓封侯

凌次仲詩格清俊名理湛然以嘉慶己巳自杭歸歛卒
於紫陽書院無子遺一妾阮文達所贈也妾旣無所歸
猶戀戀帷側不忍去曾西井大令爲經紀其喪而并歸
其妾于其妾之父次仲佐謝蘊山輯西魏書查梅史嘗
遇諸西湖至是輓以詩第三首云五十何爲者難爲牖
下情悲來歌當哭論定死猶生梵演無生法碑刊有道
銘陳雷風義古哀唱滿江城兼志西井之友誼也

沈景周讀戴金溪少寇遺稿云海內藏書無盡藏便便

腹笥抵書倉僅餘詩卷留千古親見先生目十行積案
紛紜牀左右揮毫點注墨淋浪每于未飯趨公急置袖
時聞餅餌香簡恪庚戌入詞垣改比部外擢監司晉屏
翰入掌邦禁性簡易無城府治官事如身事遇案牘如
讀書一日所見必盡而後已好天文厯算與歸安陳靜
安甘泉羅茗香往復討論而無所論說詩及長短句皆
有法度王述庵謂與許周生均以神童稱而不逮其兼
擅詞章非深知簡恪者也七夕立秋云空際神光仍費
巧定中敗葉早知秋送張子白宰鎮番云生世多情甯
忤俗及時行樂要同民亦復何減鑑止水齋及門吳晴

舫侍郎視學浙中刻其遺集並爲像贊云惟公之清斯
世共聞立朝卅載蔚爲名臣匪特慎刑終始以勤三衢
闕道德必有鄰

戴金溪司寇有花游曲集東坡句一百二十首自注引
漳浦黃忠端搥錢蟄庵詩曰詩甚可觀然其中有贈女
校書作近來此等習氣皆元規之塵也自記壬子仲月
一日同人集於小仇池山房觴春於時鮮風翦柳曾陰
釀花裙屐如雲呼瓊引白哀絲豪竹雜以笑諧側帽墊
巾風流遠訴酒闌燭跋渺渺予懷迴紅衷以狂言侍銀
屏而低唱成臺城路百字令二解百字令云比肩里畔

有桐花么鳥翩然來也天半朱霞簾底月恰墮酒棚詩
社眉語玲瓏心聲貽蕩顧影吹蘭麝香名曾識曲屏相
見驚乍同是搖落風塵青衫綠鬢客豈無情者傅粉熏
衣塗抹慣忘却娉婷未嫁遊戲人間支離牖下一笑知
音寡碎琴誰惜爲他鉛淚如瀉乙卯歲送雷二明府之
江右云記得春風月滿庭鯤弦雁柱響丁零豆拋南國
玲瓏赤黛染西湖蘊藉青曲顧瓊筵公莫舞坐聞薌澤
我先醒若爲白傅楊枝詠柳宿光中占兩星指卯春上
計時帳飲本事歆飲宮徵不減廣平之賦梅花陰平旅
次見壁間已西舊題古清平樂云廿年前事宿草都灰

矣壞壁塵封猶故紙殘墨斜行未死夢游還許重醒卻
教訴與誰聽留得舊時啼笑不妨長耐飄零錢蕙窗題
其南湖納涼倡和詞卷有字字清湘瑟上弦之句蓋簡
恪姿秉殊絕爲之輒工潘少白所謂善照者光著物而
不必凝澹於物最爲知言

階州邢佺山太守澍庚戌進士宰長興擢守南安著有
全秦藝文志金石異文錄寰宇訪碑錄兩漢希姓錄守
雅堂詩文集張叔未詩所稱邢師大雅秦中賢者也

乾隆庚戌朱文正典禮闈欲物色洪稚存作第一人始
得李鄒齋卷以策有駁問數條擬置第一繼得朱蒼湄

文瀚卷以用古文奇字遂定元及揭曉而李亦魁選稚
存名在第二十六三人皆夙學都文譽是科旗元爲粹
園尙書德文亦故雄於文者也尙書字蔚之瓜爾佳氏
由檢討官至大宗伯傅梧生爲其文孫星橋中丞景霖
跋尙書遺文冊子嘉尙書有繼志能不忘先人之澤星
橋從兄坦室司馬道光甲辰試春官冠本房有詩集星
橋乙未館選亦能詩梧生畚和星橋詩春草池塘好遊
君叔季間十千荆市酒萬點薊門山靜想幽燕氣應嗟
時世艱長城頻策馬古月照弓彎昔者蘭陽鎮風流鍾
侍郎昌詩人潘彥輔德輿由瑟獨升堂桀句尋師得名

山篇葉藏朔南今倡和未讓舊時狂時星橋官馬蘭鎮
總兵也

朱少河錫庚乾隆戊申舉人笥河先生次子也讀書好
古能世其學南厓相國題椒花吟舫圖云少河抱書志
肯構掃除三徑芟蕪猶椒馨花開一俯仰棠棣雖遠尙
可求有韓非子校正一卷其跋宋本莆陽居士集云庚
子之夏正陽門外不戒於火逼邇里居是書與家藏百
衲本史記倉猝中同爲肱篋持去余百計鉅稽始還青
氈神物護持定非偶然見楹書隅錄曩所得書有笥河
府君遺藏書籍圖記者皆少河家故物也

嘉慶丁卯翁覃溪重預鹿鳴賜加三品銜前此重讌鹿
鳴未有晉秩者自先生始宴次得詩四律和者數百家
裝爲四冊郝蘭皋戶部次韻云鳴鹿秋高振遠天書英
會後接芳筵不分先後稱同輩都合顛牙論忘年恰值
康成揆初度

鄭司農以
丁卯生

應從許渾續吟編橋名眞爲科

名設纜拜 君恩便著篇燕喜文明接景光聯鑣前後
共騰揚人看鶴髮盈新帽樂奏鸞笙煖舊簧五叟之中
松等壽七旬以外桂重香當年高會羣仙日曾著天孫
雲錦裳神姿龍鶴遜高騫問字蘇齋仿古言昔有林閭
宗雅訓今猶蘭譜續芳尊銀鉤墨蹟家爭購金谷詩篇

語不煩海內依然稱四傑白頭同日荷殊恩三五成名
故未遲華顛今更作人師徐梁羅共登科日黃綺園同
預宴時更老初霑新寵命冠童重結舊相知 熙朝人
瑞兼文瑞歌舞休停點鼓槌壬申無正科甲戌重赴瓊

林宴加二品銜

乾隆辛亥正月楊荔裳從嘉勇公由青海出師衛藏其
時聶拉木賊匪先經領隊大臣岱德等掩捕四月大軍
次定日復遣領隊大臣岱森保等與岱德出聶拉木遣
川北鎮總兵諸神保等駐兵絨轄防後路大將軍與參
贊大臣海蘭察直取濟隴舉擦木克札木令領隊大臣

副都統阿滿泰侍衛哲森寶等越峩綠山渡熱索橋克
其營壘大學士孫士毅任東路轉輸工部尙書和琳任
西路六月師次噶多繞行博爾東拉山至雍雅合兵於
利底七月戰於噶勒拉堆補木奪帕朗古橋直攻甲爾
古拉集木集廓爾喀酋長遣頭人詣營歸丹津班珠爾
等於藏悉獻所掠八月納欵班師 御製十全記勒石
於布達拉山荔裳作紀功碑銘有句云紀行詩裏無他
語只寫中華以外山自打箭鑪至前藏相傳有大山七
十二馮鷺廷序其詩謂跋涉萬六千里飛章走檄磨盾
賦詩其地爲前古所未經詩亦前古所未有云

施北研跋歐庵詩鈔後云雪水清光迴不羣同岑伫惜

異苔分三年未識超塵望一飭曾先記舊聞遺錦君推

邱主簿傳杯我得孟參軍寂寥楊子居非遠謂元衣擬約

蘋洲話夕曛多能天與秀羸償倦客清燈半倚牀靜裏

維摩聊示疾憤來元晏竟成狂逸民待刻碑頭字迴脈

難鈔肘後方扶病好尋石湖賦夜深深禮大醫王斷臂

詩成已九秋相逢地下也應休遞衣有句悲孤篋集中有悲

篋衣同解無端恨兩頭風雨半生東海夢母氏夢亡弟為東海錄事

予作東海篇人琴終古北邙愁新篇讀罷尋遺稿亡弟有詩名迥江樓

遺稿怨月酸霜痛寺樓余寒夜賦中語誰憐側帽石塘翁寫意悲

歌擊節中到處行藏看古劍都將笑傲寄秋風騷壇未
審千巖敵酒壘爭麀太白雄劇喜研收眞好事一編先
與次窮工歐庵烏程胡以權名世巽塞下曲云昨夜邊
書到朔方防秋幾處促戎裝城頭一片秦時月仍照西
風古戰場絕句云僧閒愛向深山住茅屋終年絕送迎
月黑禪關聞虎嘯松風捲地一燈明吳山謁伍大夫祠
云越絕漫誇君子甲吳中長記大夫簫夜績課兒圖爲
汪龍莊題云孤兒嫠婦三人影破卷殘機四壁聲均見
清迥宜北研之傾倒也

蔣子延震澤寓齋雜作云大原有遺老

王曉庵先生

文行重

國初其學通天人布衣勤著書秘篋世罕見

謂新法圖解諸書

所刻乃其餘寥寥百年來繼者皆弗如近數張夫子

江鱸

孝古文重璠璣彬彬及門盛僞學一掃除老住爛溪上

風雨剝草廬嗟我不獲見感逝徒歛歔鱸江戊申舉人

讀書爛溪之濱爲文和易優柔家甚貧行甚高卒於道

光甲申年七十姚文僖謂時天下方崇尚詭異以雜引

非聖之書爲博以摭拾舛濫之語爲新君獨好用我法

錢衍石謂文僖督江南學先生與有舊禁諸子勿應試

其耿介恬淡如此

鞠谿大令甯貴尊人曾任永定河道有名畿輔鞠谿宰

婁縣於書院諸生加意培植遇童子試則以春秋傳命詩題俾各留心講肄孀婦某守節八年父兄以乏食欲奪志捐資爲久安計節母褚張氏著易道入門四卷爲序而梓之撫教其孤雲鵬備至乾隆辛亥以迴避調任安吳婁人戀之作詩六章留別和之者不下數百人有鄉民工畫者繪吳隱之酌泉圖并著說以獻祝芷塘有詩云泉水何妨酌貪廉只在人畫圖求故事直道見斯民桐城石渠太青歿於鞠溪阜陽治所鞠溪爲殯斂且厚遺以歸其喪鞠溪子德元字野客能詩亦見循吏之必有後也

潘榕皋謂自元人製曲詩餘久不播絃管劉曷燕樂新書不可復見所可見者朱子全書所載宋樂工度曲譜耳余得白石老仙詞譜以問國工無有能解者今之言詞者動謂大晟樂譜失傳時譜工尺不合於古不知楚詞大招已有四上競氣字則唐宋以來諒亦同此雖有異名實無異用安得起白石講明融貫之見自撰水雲笛譜及所題葉懷庭遺照詩注懷庭深明律呂所著納書楹曲譜一時度曲者奉爲圭臬榕皋詩直將心事付枯桐消盡清愁是九宮博帶深衣巖壑裏風流何似紫霞翁換徹移宮響遏雲桂庭涼月白紛紛蔡邕仙去桓

譚老清梵魚山不可聞謂庚戌八月夢樓招飲經訓堂
聽懷庭度曲懷庭與夢樓俱謝世也

天津沈峻存圃令吳川五年以細過被嚴劾張松園吳
曇繡憐其才爭之不得遂有西域之行實夫太守穆爾
薩里時官鎮西相識天涯時相倡和其贈實夫詩云準
夷舊部連伊吾雄城雒雒頽壤糊雪山繇延走西極珠
光玉潔寒侵膚傳聞漢將破呼衍穹碑半蝕苔生趺更
番列戍屹重鎮承平擊鼓吹笙竽猗歟穆公作太守滂
仁曠義陳嘉謨行之一年遂式化譬彼時雨苗其蘇放
衙吏散文字飲幕府參佐能投壺拈山經紀新語軒

轅臺下彎雕弧題名歲月傳不朽壯志已足驚休屠竟
肯輶車訪寒峻風塵拂拭忘其迂俗書澈句慙踈獻公
爲色喜心交孚輪臺草衰秋氣早失羣塞雁鳴相呼蒼
山落日渺于里側身東望悲羈孤何時從公作揖客擺
脫禮數成狂奴伸紙愛寫循吏傳更須索酒趨兵厨知
公大笑容侍坐短褐光映貂襜褕人生遠游良不惡請
看九譯恢皇圖龍雨樵爲序其塞外詩鈔庫爾喀喇烏
蘇距雅爾巴哈臺二百餘里多屯田者丙辰春隨廳川
節使奇豐額往遊其地至秋歸有閱耕集一卷次年同
兩樵被命北旋次子文和公兆雲以丁丑館選猶及見

之鹿苹副憲恩嘉則其曾孫也

吳人樊研雲工六法人恬淡家貧多病居楓江之濱年
三十歿歿後金子青尋其篋中得詩兩聯獨行云水流
人影去山暗雨聲來早秋云亂泉通夢秋驚鶴衰柳含
風夜帶蟬越日復于陳校書扇上見送春詩云續完殘
夢滿迴廊黯黯離人半斷腸更有暮愁禁不得亂鶯舞
燕泣斜陽暗卜金錢暗買春小姑含笑復含顰世間多
少消魂事弱柳無情亦送人反面畫紅芍藥詩云一尊
婪尾侍花王惜別東君淚萬行愁近曉煙斜霧裏子規
啼破夢微茫檀奴小字到紅妝吳下題詩有十郎花亦

如人顏色好袖中春色袖中香自識云初下筆時苦恨
臙脂不鮮及贈後顏色可愛復于袁綬階處見病起詩
云亂蟬噪處夢難成骨似蘆柴一樣輕若說我心非木
石便疑人世有功名貧來交友須求淡雲起看山便不
平到死始知求活計莫從仙佛學長生研雲素患肝氣
常謂子青曰畫平肝氣四字乃南田印章也子青有追
悼樊大二截句云舊愁新夢送春詩人世功名那得知
猶有故人題扇在可憐花亦號將離消夏灣頭雲亦收
吳娃打槳木蘭舟采蓮不采眞花去藏得人間團扇秋
其和劉大寒窗雜詩不學圍棋多死著愛樵花鳥有生

機十年舊友寒山路一箇草亭一草衣亦爲研雲作也
貴陽朱勇烈射斗由行伍從征緬甸大小金川廓爾喀
累功至川北鎮有朱虎之目平苗疆賞勇號殲教匪包
正洪賜世職總督魁倫失防嘉陵江檄公赴援追賊至
蓬溪老虎巖直搏賊壘眾寡不敵猶手刃十餘人遇坎
墮馬歿于陣時嘉慶五年也張西村乃孚弔勇烈詩黑
雲渡江江水流江花江柳俱含愁壯士荷戈夜僵立風
餐刺骨聲颼颼去年賊燒雲門鎮飲馬不敢窺江頭自
古長江限天塹飛渡豈聽人爲謀有河如帶當干櫓有
將如虎作砥柱天險人和果作憑鼠子縱橫莫余侮豈

知晏安撤藩籬石沱潛渡逞餘怒烽火萬家委賊巢新
鬼啾啾青燐聚羽書星夜馳軍營七日師行三十程淮
陰囊沙無人用條侯堅壁先自驚可憐倉卒談兵者猶
說持重推老成檄召一軍衝前敵牽制機宜難奏績老
虎巖前殺氣多赤霧滿天白日匿直探虎穴取虎子蟻
聚蜂屯勢相逼持矛瞋目殺多人後勁不繼空太息我
今不死非英雄遺恨未滅此朝食尸橫撐距淚闌干烏
鳶啄肉不忍看七年轉戰秦楚路藁碇從未唱刀環鴻
溝已失嘉陵險西南健將旋凋殘涪水無情自東去殘
鷗落日潼川樹招魂無人埋薛碑牂牁銅鼓歸何處鳴

呼材官鐵騎看如雲一身擁衛徒紛紜落星偏爲大將
兆當日陷陣何無人至今惟說朱將軍賊退殘卒收公
骸歸葬遺其左足明日川民于戰處得之別葬于潼川
鳳皇山仙人掌公子樹欲奉足歸川民哀留之遂別爲
墓建祠祀之樹官至漕運總督時有達音布亦從征廓
爾喀以副將擢松潘總兵剿黔楚逆苗陷陣衝堅所向
克捷晉甘肅提督留川剿辦教匪嘉慶三年匪首冷天
祿踞開縣祖師觀相持三月仰攻不得奮勇薄卡徒步
搶上比及兵力合撲已被斫隕命亦當時死事最烈者
也

煦齋協揆爲人作書輒用鸚哥嬌印章東坡集以草書
雜用真體者謂之鸚哥嬌譬鸚哥學人語不全也法時
帆題其尺牘云尺書寸楮全金裝嗅之字字梅花香寫
經樓上謀鐫石筆勢欲奪鷗波席潘少伯煦齋先生自
龍沙寄惠書幅云龍沙積雪望嵯峨海角羈臣近若何
左相丹青猶倚馬右軍書字慣籠鵝窮荒尙荷重茵遇
時有病蒙賜玉庭芝圃隨侍白日終憐雙鬢皤若問山陰孤詠客五
年病頰不能酤蓋協揆善畫也李敬之韋廬外集培石
樵出其尊人暢齋比部畫馬卷索題云秋曹何從得此
馬不逢伯樂無知者目光搖電耳卓錐骨相權奇態閒

雅揚鞭騎出鳳城東天衢騰越如游龍寫入冰綃貽驥
子待看萬里追長風暢齋不知其名附識於此

瘦石侍郎達慶書學東坡嘉慶乙丑由葉爾羌大臣擢
授參贊旋拜副都統之命成倬雲侍郎於丙寅補授閣
學仍留哈密大臣任其得達瘦石書賦寄云閒關無那
已三年易地相思倍惘然西北連山太古雪東南飛鳥
故鄉天受恩絕塞憐重疊屈指歸期計後先萬里題書
相問訊長箋潑墨憶蘇仙

乾隆癸丑阮文達視學山左錄諸生課作四卷中如四
氏孔昭虔顏崇榘掖縣翟云升棲霞牟廷相益都段松

苓灘縣陳官俊後皆有名於時

尙書納穆札勒圖伯特氏以靖邊將軍平葉爾羌死事
晉贈義烈公入祀昭忠賢良祠子遠峰相國保甯由親
軍襲爵以戰功游擢江南提督授成都將軍乾隆丙午
授四川總督乙卯以吏部尙書協辦大學士嘉慶己未
正揆席兩鎮伊犁伊犁有惠遠綏定惠甯霍爾果斯固
爾札塔爾奇哈什他爾哈哈烏什爾里克九城歲修保
固屹然重鎮焉惠遠城南二百里爲特可斯之河分釀
一渠至城下以濟漕運建置祠廟設立官當舖歲入贏
餘以裕旗營生計壬戌還朝丙寅予告戊辰卒謚文端

爲人恂恂善下雅重文學江都韋西山謫戍新疆文端
重其學館之高齋西山詩領袖周廬直御鑾英風綺歲
早登壇總戎吳蜀麾諸將獨坐公孤川散官北落羽林
環四五西蕃毳幕駐三單久空胸臆銷金甲姓字偏驚
塞膽寒虛左中書政事堂新恩首揆畀元良知深李令
心如日眷篤裴公鬢有霜蕃漢無分大總管起居爭問
老平章東雲痛灑攀髯淚夢繞山陵謁 上皇

長洲吳玉松先生雲癸丑試策爲阿文成嗟賞以補應
殿試例不在十卷進呈之內嘗佐朱南厓相國幕相國
自比李鄴侯先生規之曰鄴侯亦太癡旣爲宰相復思

作仙無怪乎秦皇漢武矣相國默然一日睨視青天當
有鶴至復進曰公軀幹甚偉瘦鶴恐不任騎或海上有
大鵬來乎相國頗不悅後掌翰林院或曰吳雲公所最
賞當首舉相國徐云吳雲太悻直不入時竟不果官御
史彈劾權要頗著直聲出守彰德有不畏強禦之稱去
官後卜居未定僑居山塘詩酒自樂道光丙申九十壽
取潘功甫小令中五字曰 高廟老詞臣鐫小印謂庚
戌磨勘覆試卷時宰欲斥予進士籍賴 高廟獲免小
臣客塞外逃聞橋山弓劔遺詔痛哭不食者竟日至今
有餘慟焉丁酉卒嘗有句云噉名客到門先閉諛墓金

來研已焚蓋耿介其天性也初以諸生佐褚筠心學使
幕激賞謝薌泉文定爲弟子員第一及戊申薌泉主江
南試而玉松乃出其門薌泉病劇以詩文付玉松校定
焉論詩稱朱子不墮理障爲正宗若邵子擊壤體流弊
至太極圈兒變爲惡道矣詩兼比興賦自別爲一體非
言性道之書晚年以公子靄人學士歿意大傷之間取
妓樂自遣於是句欄悉求品題月朔望必造門問安侍
酒終公之身陳梁叔詩詞翰常看篋底存風流逸事待
重論青山此地堪娛老紅袖當年盡在門春雨樓頭聽
屢響秋波簾外照眉痕而今始信惟公達肯擲金錢辦

酒尊山塘書感作也

大庾戴篔圃太僕之弟可亭相國子文端公衢亨叔姪
閣臣值軍機乾隆乙未相國與文端之兄若士編修心
亨同入詞垣戊戌文端除脩撰時稱江西四戴嘉慶戊
辰相國以閣學得假歸里文端赴清江工次 仁宗謂
使事畢卿可一歸省卿叔父文端紀恩詩有此去竹林
勤問訊親傳天語到柴門之句道光營初陵相國偕英
煦齋相度興工旋以老子告 宣宗製詩寵行戊子重
赴鹿鳴適寶華峪地宮水滲嚴旨逮入都引咎陳辭得
體除名放還翁文端旅舍題壁云蕭蕭白髮返家山終

感 君恩特放還一樣孤臣悲絕域可能生入玉門關
蓋相國南還而煦齋遣成文端未第時嘗客相國南昌
里第者兩年又煦齋協揆門下士也

高藏蒼巖善指頭畫爲慶蕉圖作覓音圖已見續集陳
笠颿中丞藏其畫鞠一頓宋子廷詩十指作畫煙雨溼
鐵嶺家風世難及無那霜寒月墮時寫出風前幾枝立
溪雲舊琢裁書硯捧向清齋賸東絹欲和淵明采鞠篇
更乞八分題一徧笠颿招集飛霞閣作也考恪勤一派
涵齋穀齋及甘懷園皆親承指授傳凱亭瑛夢禪亦是
大宗甘和庵西靜遠衍其餘緒恪勤從子璫敬一孫秉

青疇皆秉家法青疇著指頭畫說託興丹青兼工摹印
魁倫敘齋亦工指畫涵齋長子孝先則再傳而得心印
者也蕉園將軍官江蘇嘗以重九登元妙觀彌羅閣指
寫巨蝶於白玉蟾側生動活潑栩栩欲飛與榮晉麗軒
指畫人物均爲時所稱冠九廉使亦自謂追蹤且園且
園行書入逸品涵齋雅善擘窠冠九取法北魏嘗見穀
齋題畫之作詩旣清超書法直入登善之室皆不徒六
法爲工

朱文治詩南居餘姚東郭瑛夢禪爲指畫繞竹山房圖
詩南題夢禪自畫小影云對鏡白寫真閣筆不書判眼

底有滄桑胸中貯冰炭學佛仍飲酒學仙不求藥曾作
宰官身君輸我一著以大挑得海甯教官海昌雜詩有
云阿爺傳子子傳孫見慣停棺聚一門白骨如柴看火
葬幾家窀穸有歸魂有訓俗之道焉

上元葉健庵中丞世倬以甲午舉人起家令長厯嘉興
德安西安同知浮湛二十餘年年六十始守興安嘉慶
丁丑擢延建邵道道光二年遂開府福建兼署總督宰
長甯日氓俗重利輕生小忿輒殺子以自明公曰父子
天性也是可縱乎治以故殺子孫罪其風遂戢癸未年
七十二以老致仕寓揚州鄧嶰筠尙書贈詩云建牙手

布八閩春 詔許懸車拜命新燭物雙瞳猶翦水憂時
兩鬢已堆銀卽以是年下世

高郵金畹芳明經故錢辛湄詩弟子嘗從翁覃溪校士
山左有題黃秋庵所藏武梁祠象詩原冊舊藏馬秋玉
家後歸汪雪疆龍尾山房汪贈秋庵秋庵雙鉤鋟版舊
載朱竹垞跋云右漢從事武梁祠堂畫象傳是唐人拓
本舊藏武進唐氏前有提督江河淮海兵馬章後有襄
文公順之暨其子鶴徵私印漢自趙岐營壽藏圖晏平
仲羊舌叔譽東里子產延州來季子四象紀諸史冊此
外如朱浮魯恭李剛魯峻董蒲范叟諸祠墓畫象刻石

者非一惟梁祠人物最多洪适隸續具摹其形古帝王
忠臣義士孝子賢婦凡一百六十有二人是冊存者僅
帝王十人孝子四人而已由黃帝至舜圖皆服冕禹手
操掘地之器冠頂銳而下卑殆禮所云毋追者是觀此
可悟聶崇義三禮圖之非桀以人爲車故象坐二人肩
背隸續所摹失其真矣每幅上下四旁有小字分書題
識姓名或間作韻語趙明誠稱其字畫遒勁史繩祖謂
其筆法精穩可爲楷式觀者但見墨光可鑑元氣渾淪
驗爲唐本不虛也查初白跋云畫家著錄多始魏晉人
不知東漢石闕圖寫人物已多第存者寡爾武梁一碑

乃唐人拓本洵不易得圖中機有絞車有蓋庭有幃略
見古人制器形象曾子母萊子妻履絢皆銳頭當知漢
日女子已非赤腳亦可資考古之一端也康熙丙戌人
日雪阻葫蘆山房復同竹垞把玩書此

山陰何綱文客粵中聞南海閩秀徐叶英能詩強委禽
焉綱文母復爲聘同里胡氏女兩未之知居粵十年舉
二子偕歸胡本豪家聞之欲絕婚何母利其富竟逐叶
英娶焉胡氏并逐二子幼者以悸死徐被遣無所容邑
有菩提庵住持尼何之叔母也與其子兆熊往依之後
其弟夢山自粵來訪相見 慟欲訟之官徐不可曰祇

苦何郎爾遂謀攜子兆熊返粵徐善星家言藉此以資
行李至無錫詩人吳一峰遇之得其顛末并見其詩三
卷多可喜者賦詩以贈梁諫庵亦爲作徐孃行紀其事
并著其詩於簪記中聞雁云何處飛來絃上聲人聞天
下共淒清莫爭先後爲賓主甯識炎涼有弟兄弟夢山
間關來
訪 萬里翱翔雙翼健一江搖落早寒生十年去國懷鄉
客此夕樓頭夢亦驚煮菊云寒閨久病無良藥借洗秋
心一字愁感懷云少陵猶說文憎命何況詩詞說女兒
瓷杯容二合許中肖一人若神仙狀胸有小孔以爲斟
酒之度或稍越之必盡寫乃已名曰平心杯蓋古侑卮

之類也海鹽馬緯雲葦舟有與楊西河王秋塋孫淵如
集吳穀人夢煙舫詠平心杯聯句詩

惕莊權使全德戴佳氏乾隆間任兩淮鹽政嘉慶七年
卒王鎮之挽以詩云兄事好論十年長心期早許一言
知尊前絲竹成泡影袖裏詩篇惹夢思則權使固工吟
事也

額約齋在農曹時與潘榕皋論詩最契緣陰晝靜之軒
其讀書處也嘉慶季年榕皋里居懷約齋侍郎之作云
云粉垣雞鶴憶同枝芳訊傳來感別離壯歲知心能有
幾衰年會面復何期鶯花燕市春回後冰雪湖天臘盡

時昨日松風引我夢與君攜手諷新詩感念今昔交誼
可想

蔣襄平開府嶺南劉孟塗上書言利弊喜而厚贈之謝
枚如嶺南雜詩孟塗慷慨賦高軒卻有尙書聽直言一
瞬南園三十載海濱消長幾潮痕嘗語李畏吾曰人人
家但觀几榻位置足驗興衰畏吾錄入嶺雲軒瑣記在
蜀監臨鄉闈詩題爲工部草堂嗣與聶蓉峰學使游草
堂相與賦此題以角勝送瞿頡菊亭謁選詩云天設名
場困此人文章磊落性情真游兼關塞詩兼史曲譜忠
微妙入神

著有鶴歸來傳奇

一片宮商含鐵石平生琴酒雜風

塵詞壇久擅扶輪手富貴何須早致身銅章忽現宰官
身老驥知途定絕塵繡隴雉來春有腳訟庭花落聽如
神飽諳草澤煙霞癖留得詩書面目真自古親民先善
俗絃歌不乏采風人相國自號鈍庵而穎特強記熟於
左氏傳卿大夫氏族源流分合能條舉無譌扶持善類
如唐陶山巖樂園劉松齋趙邃樓林竢邨皆所薦達與
陶雲汀同官江蘇以事齟齬亦其夾袋中人也子沛奮
員外乙酉副貢才品俱勝而盛年萎謝不竟其用雲卿
中丞由戶曹出守開化洊至黔撫以功德在民子諡勤
愨建專祠焉

山陽汪瑟庵協揆質直高簡飲食衣服無所擇惟喜醫
喜弈法梧門詩長夜挑燈箋素問此事年來深自信愛
聽雲房落子聲松陰久立殘碑認道其實也 宣宗臨
雍以舊學加太子太保卒祀賢良

蘭泉尙書福慶鈕祜祿氏宏毅公裔孫善繪事嘗爲法
梧門畫掃葉亭圖梧門謝以詩云尙書重朋友寒暑心
弗知舊冬風雪深余手籐箋持乞畫掃葉亭識公喜臨
池寒夜紅燭翦凍墨皴桐枝退食得片暇未聞賭琴碁
月明寫水色雨過塗春陂積月以爲年未嘗閒斷之蓋
嘉慶辛未歐陽生日梧門邀同人祀于掃葉亭飯已游

西侍御圖亭侍御援琴作歌王雲泉高泖漁黃東鳴朱
野雲吳南鄉馬蘭谷陳淥晴諸人合作斯圖梧門題長
歌蘭泉及蔣秋吟關午亭顧子餘畫則皆補繪也若詩
龕圖則前七家後七家外尤不勝紀

黟縣朱約齋孝廉霈近體清婉王惕甫謂其清峭處如
落葉有歸心諸語殊近閩仙高閩處如江聲抱佛樓諸
語極似錢劉乙酉因梧門祭酒得交百菊溪館頤園者
三年五坦園侍御並遣子弟伴讀避雨山麓期坦園侍
御不至云亂石如羊閣岸斜懷人待駐短轅車鷓鴣啼
罷風吹雨溼遍空山枳壳花

儀徵詹石琴乙卯孝廉詩近晚唐詞宗南宋吳穀人主
講樂儀爲序其詞稿絕句云一片江南指顧收李花吹
落又婆留不教臥榻空齟睡忘卻燕雲十六州

李公博司空得元康里氏所藏唐拓廟堂碑及唐拓化
度寺碑皆親自鉤摹上石故所書於虞歐爲近鄧子立
乞爲其先人書墓志銘云當代數書家張照王澍各擅

能碑版走四方纁帛充門庭近者諸老中推諸城劉大

興翁桐城姚及錢唐梁亦海內所稱先生賅眾妙力與

古人爭唐楷廟堂虞隋眞啟法丁度架皆至寶璀璨如
列星臨池一規橰典則昭前型子立嘗爲賦靜娛室八

詠一漢淳于長夏承碑無錫華氏眞賞齋舊物一隋丁
道護書啟法寺碑賈秋壑舊物一虞書廟堂碑眞唐石
得一干有四百四十六字一唐魏棲梧書文蕩律師碑
此本翦去魏名竄取碑字託名褚書一文與可晚靄橫看鄧善之詩此老
墨君三昧雲山發興清奇我在蓬萊書府曾看晚靄橫
披卽指此卷一李迪牧牛圖一晏元獻所藏銅雀瓦硯
一陸放翁硯硯出瞿塘乾隆間入內府尋賜閣臣某硯
端有無記南園而潑墨語蓋閣臣某所銘也

貞女覺羅氏理藩院員外郎額爾德尼女年十二許字
漢軍范樹葦時額以起居注主事出知達州樹葦祖宜

賓由江安布政入爲副都御史適額由貴州平越知府
丁憂歸旗方謂成禮有期而宜賓以事成邊樹葦以叔
父之喪父母復相繼謝世亦積勞成疾竟不起貞女聞
之慟甚誓以身殉旣而念宜賓夫婦春秋高無人侍養
遂往范氏守貞族黨無不高其義者陽湖湯狷庵脩業
爲作貞女行以紀其事

湯狷庵有鄭荃陽庶常冤獄辨五篇謂荃陽與黃石齋
文湛持稱石交天啟二年湛持疏刺客魏留中不發鄭
卽繼之幾罹不測賴福清蒲州兩相力救而免奪職爲
民峯陽杖母之獄發難者溫體仁體仁旣去其事漸緩

而張至發楊嗣昌揚其波體仁欲傾湛持不得不翦除其羽翼鄭又出言不遜逢彼之怒至發嗣昌欲傾石齋鍛鍊成之石齋與嗣昌廷辯於前復爲作墓誌於後石齋非可欺之人峯陽亦決無杖母之事峯陽父太初與楊氏爭屋成隙崇祀乩仙皆召禍之道峯陽恃才傲物見忌鄉里官僅庶常而建言起用資望已深故體仁借杖母以阻之許曦輩爲放鄭小史妝點聳聽永叔帷房之謗文山匿服之譏貝錦一成不殺不止孫淇澳不妄交著困思鈔慎獨義諸書獨與峯陽商榷果如委巷流傳之說則淇澳比鄰豈獨不知峯陽被逮之時正淇澳

病篤之際又何疑其不救石齋念臺黎洲主持清議爲
之訟冤張紹秋輩與鄭素無德怨但據風聞不復核實
顧甯人亦復聽人言作詩譏刺因作鄭案傳信錄以存
其真朱石君爲狷庵尊人門下士其答石君並柬令兄
竹君詩有云醜儒審行藏尤欲慎語默匪徒競浮名斂
華就其實惜哉天山翁登朝大戇直一斤不少挫抵掌
奸相側奸相詎相容力奮含沙惑大獄突然興厚誣伏
波惹黨惡漸盈廷奚啻虎而翼遂令服上刑肢解同挫
齧當時盡骨驚異代猶心畫可怪汲古家罕能得要襪
亦爲峯陽事而發所著賴古齋詩文張宛鄰爲之校刊

其女夫也

科舉不用試帖惟鴻儒大科及巡幸召試則有之乾隆
丁丑春始詔試士去表判易以五言八韻唐律一首紀
文達舉唐人試律課諸生謂試律體卑作者率不屑留
意摩詰之秋日懸清光清如玉壺冰文昌之夏日可畏
行不由徑反舌無聲茂政之東郊迎春昌黎之精衛銜
石填海柳州之觀慶雲圖大抵疵累橫生不足爲訓是
皆百里不治不害其爲龐士元者也試帖多尙典贍文
達始變爲意格運題館閣諸公每呼此體爲紀家詩見
題從姪虞愔試帖自注復取康熙庚辰至乾隆庚辰作

者爲之評點注其故事蔡立青周比部賦得詩題詞云
昭代文章炳英才雅頌宣休明憑鼓吹教育荷陶甄慎
憲賡歌再論思奏御千陳詩頌甲令校士肇丁年藝苑
工程巧詞垣業謝專同風羣輩出近製九家傳九家謂
錢塘吳錫麒長樂梁上國蒙古法式善長洲王芑孫南
豐雷維霈靈石何元烺江陰王蘇大庾李如筠靈石何
道生有合刻賦得詩行世也嗣是鮑覺生陳秋舫別集
不廢試帖陳左海詩文集外亦有東觀存稿之刻李越
縵謂試律自有家法紀曉嵐墨守唐人穀人稍變化之
後來王澹香陳秋舫皆嗣響唐音尤推能事劉芙初楊

雙泉鄭念橋皆別調矣管絃若選唐詩謂場屋試帖大手筆皆不屑爲所謂類於俳優者也茲惟存錢起湘靈鼓瑟一篇亦以其結句入神而存之且吾見能爲試帖而終身無與于詩者矣安有能爲詩而顧不能爲試帖者哉此論最允館閣詩尤以七言長律爲難工殷桐高有 聖駕親征噶爾丹蕩平凱旋正值太和殿鼎建工成覃恩肆赦恭紀一百韻最爲長篇乾隆戊子大考翰詹題爲紫禁朱櫻出上欄得圓字 高宗御製詩云白華早落三春月朱實紛垂首夏天名擬麥英齊麥候甘稱崖蜜異崖巔託根禁籞迎風熟結果芳叢映日鮮樹

訝珊瑚爭燦葩珠疑火齊各勻圓充堪鳳實誠如是殘
以鳥含夫豈然帶籠底應和酪飲傾盤乍許當茶煎漫
訾內熱猶須蔗見詠席吟可類賢翰苑分頒猶欲問誰
同摩詰付吟篇至五言試律屢見天章庚辰朝考題南
風之薰得同字 聖製詩有云在位虞賓讓來儀鳳鳥

聊誠天縱多能也已

德宗賦得楊柳讀書堂詩有
句云金石聲俱出樓臺畫不如

靜樂李石農方伯鑾宣嘗緣事遣戍有荷戈集古城驛
云排空埤堦塞垣長日薄崦嵫憶故鄉一片牛羊衰草
白萬峰冰雪暮雲黃春流如帶環孤戍斥堠無煙冷戰
場莫道天山落吾手異時東望更蒼茫甘州云月氏遺

壤古甘州井竈千家入望稠天外白山如玉立

天山亦名白山

馬前黑水抱城流蒼涼亭障沈邊色寂寞樓臺迴暮愁
過眼煙雲堪一瞬不須重憶舊林邱五涼偶詠云女牆
低處迴蒼煙立馬平蕪意惘然蔥嶺東來沙是海玉門
西去雪遮天蔓纏古甃留秦篆水漩寒渦出漢錢莫到
受降城上望白龍堆在塞門前

上海李參軍心衡以諸生官四川綏靖屯最久輯金川
瑣記有四時詞云獨松戍畔草初生半畝園中鳥自鳴
邊地只今多雨露家家火種又刀耕泛泛皮船逐怒潮
輕輕竹竿度危橋誰知六月荒山裏尚有千年雪未消

甲索山空木葉稀金川水冷雪花飛短衣匹馬追狐兔
徼外秋深正打圍釀來咂酒不須觴炙得豬膘分外香
蠻俗也知歡度歲蘆笙銅鼓跳鍋裝潤州許文雄贈參
軍詩弓衣斜壓赫連刀疊雪山城虎嘯高將略詩情堪
自許一時意氣爲君豪塞雲高捲五營連壯士齊歌敕
勒川繡額蠻牋索詞翰定知人羨李屯田亦下僚之雅
材也

亦庵佐領秀德乾隆癸卯舉人襲雲騎尉查春園肄業
成均時與之交善有詩云論文三載樂相於強識君真
行秘書舌本瀾翻匡鼎似離人聽了亦眉舒爲亦庵作

也質齋考功瑚東阿嘗從春園問業春園懷人詩云仕
優而學似君稀戀我三年習問奇半部魯論成相業讀
書端的爲匡時質齋年十八以蔭補官能不廢學爲足
尚也金子青上舍同賓石蕉農兩孝廉仰山比部僧寺
夜話云兩三秋士寄幽跡紅白野花開夜涼絡緯上籬
蟬上樹催他殘月下空廊蕉農舒穆魯氏名文藝亦乾
嘉時吾鄉佳士

羅山黎襄勤以縣令起家宰南昌五年庭無滯訟督南
河最久清操孤立省歲需二三十萬 宣宗御賜詩有
偉哉防濬力瘁矣十三年之句其野桃同百文敏作云

無復雕欄護麴塵短籬灼灼占青春仙源猶記前番路
瘦倚東風笑看人江村細雨落花時竹外猶留三兩枝
惆悵兔葵和燕麥劉郎回首鬢成絲見說元都道士家
春來日日飯胡麻若教共喫桃花粥也向瑤池掃落花
家住清淮灣復灣年年春到畫簾間情深誰似桃花水
一片紅波映髻鬟詩情婉約可入梁園風雅

屠琴鳴稱吳蘅皋詩孤情絕照若擬孟郊秋懷若雜擬
若聽鐘鳴悲落葉諸篇是有真性情馬陳白雲則謂其
以窮諸生抱至性堅骨兀兀學道冬餘必循誦十三經
一過詩取中晚每謂義山具體少陵飛卿學步太白世

都以纖豔少之謬也山居云徑草纔蘇綠不肥空濛煙
靄淡朝暉石頭路滑喧人語驚起林間雉飛歸舟過
北新關云隔岸桃花映市門漁舟初上賣河豚數聲柔
櫂嘔啞裏暮雨靈風過謝村寒食舟中云天桃一抹淡
胭脂水上人家放鴨時貪看尖山點雲碧都忘風雨蓋
蓬遲

吳蘅皋感事詩云天上傳明詔冰山勢已消禍因連七
貴德自格三苗氣盡豺狼窟恩深雨露朝從茲太平日
私幸老漁樵郿隍金空聚東園器竟收黃塵惟見馬閣
道已亡牛幾日歌牢石何人事五樓南臺問消息不到

稻梁秋翦韭莖還在由來日漸長不聞伊徙雁當鑿戟
爲牆縱仗金刀捍深憂鐵拔傷願憑甯朔武努力斷併
張太息天關遠傳聞訝不同孤飛青雀子側聽白鳧翁
怕養蘆成荻防教馬作龍杞憂終未釋嗚咽對東風此
己未春間作也未首意不知何所指

慈溪余石臺上舍江嘗挾醫術客游平湖乍浦往來淞
江三泖間歸里後與胡清溪處士爲石交壬申年七十
易簣前一日猶手披遺稿自謂詩情不磨外孫王約爲
之校刊雲溪晚眺云一磬出深碧四山多白雲早梅云
幾點雪非雪一枝春未春自是四明四友詩一派柯振

嶽訥齋謂其五古沖和古淡於詩品尤高云

定遠方有堂方伯以拔貢就職州判發四川累勞擢令
閬中權梁山破賊完城軍中紀事之詩爲多以功擢甯
遠守調夔郡遷建昌道討涼山生番折多山途中作云
又向諸峰頂上行據鞍殘夢恰纔醒日將出海先騰赤
山到摩天不放青晴雪四圍新玉堵穹廬萬點小龍庭
翳空毒霧驅全盡絕徼神祇也効靈蓋山多妖沴白晝
陰霧作雷雨連數日不得進有堂爲文以檄之一夕遂
霽故有此詩旣受番夷降復定裏塘土司之亂厯川北
鹽茶道嘉慶十二年授按察使有平馬邊前後營熟夷

赤夷與峩眉嶺夷功十四年遷布政使在蜀二十年身
習戎旅瞭然於山川之夷險用兵輒獨當一面陶文毅
庚午典蜀試題其敬恕堂詩藁云專闔詩王國居然擁
百城文章餘古氣經濟稱時名字外猶鋒露軍中紀槩
橫從來請纓志未許薄書生卒年五十有一

師荔扉以舉人挑補劔川學博軍功舉授望江知縣前
後八年一介不苟晚成滇繫百卷徵入史館劉孟塗稱
爲西南不可無之書有志時務者必將有取查梅史題
荔扉小像冊云大雷池岸放朝衙卽墨當烹聽勿譁如
爾彈文真俊煞擁書未了又看花遺稿徵求上史車水

西軼事勝朝餘石渠天鹿諸年少爭讀先生死後書詩
龕曾見春風筆宦轍偏疏白鷺羣如畫江城如水事祇
應淒斷小停雲藏有陳小憐小影卷沒歸程荃蘅衫梅
史有詩

倪恆園爲文正從子名會宣前明諸生所居曰萬玉樓
日以著書爲事熟算法精隸書集有乾象通鑑綱目五
旬外多寓白下蓋有先祠在焉施尙白倪園弔文正詩
卽其地卒年八十餘有日記於國初鄉里諸事縷縷可
悉其云有呂友住石門晚邨因自號焉見其所選十二
科闡墨彈時太甚亦過於有爲非純德之士也後其人

果遭身後之禍餘姚岑鏡西詩石門著述太彈時早被
人窺不自知天蓋樓頭天外想惜他一面識公遲記其
事也鏡西多識鄉邦掌故其題文正畫石謂前人論書
句云鴻寶犖确如老菱悔遲詭如躑足蠅蓋當時二公
以此相嘲亦見老輩風趣悔遲陳章侯號

劉藉亭履懌爲秋槎典簿弟其論詩雜詠自注謂唐鄭
嶠津陽門詩注長生殿齋殿也有事朝元閣御長生殿
沐浴飛霜殿卽寢殿白傅長恨歌以長生殿爲寢殿殊
誤其季弟諤亭履懌讀史云蘇秦遊秦不得志東說六
國西擯秦縱橫辯士不足數能使六國相和親秦兵不

敢出函谷關東士飽甲兵足張儀早死不殺秦持刀直
欲斫秦鹿樂毅但能敝齊國魯連但能卻燕軍惜秦不
遇信陵君其一燕兵六十餘萬人西攻殘趙不禦秦燕爲
趙敝秦敝趙趙亡秦與燕爲鄰早知燕趙爲唇齒併力
擯秦相角犄急令栗腹救長平更使慶秦距漳水秦不
亡趙燕不亡燕丹私怨何足償前忤樂間後鞠武父子
委肉飼秦虎膏梁貴胄無奇謀荆軻可憫亦可羞後來
幾誤張留侯從子楚楨謂朱子綱目書荆軻爲盜此春
秋書法侯雪苑袁簡齋故意揄揚以駁朱子非也梁芝
五易水行贊荆卿并贊留侯此詩暗駁芝五本之明何

仲默而存趙以存燕則仲默所未及諤庭妻成瑞華子
羲則婦華氏皆能詩一門風雅惟秋槎名較著其詠荀
卿云功名進退隨黃歇學術源流誤李斯亦正論也

嘉慶元年仁和張楓庭亡陽由潼關經歷擢宰東鄉九
月達州教匪作亂縣無城與賊營僅隔一水楓庭百計
扞禦者三閱月冬晴水落賊涉淺登岸遂手刃數賊而
死時除夕前一日也明年賊退跡其尸不得忽羣鳥聚
噪則壞垣下微露手足蓋路人哀而覆之者掘視之面
如生吳秋漁與交善有長歌哭之毛海客以五年三月
殉難簡州秋漁時宰崇甯亦有輓詩與海客皆嘗游幕

山左也海客由惠瑤圃尙書招入幕從軍西藏以功補
潼川府經宰中江擢州牧殉節後姚一如方伯爲序戲
鷗居詩鈔室人吳若雲絳珠亦能詩秋漁輓楓庭詩有
云赫赫袁何兩總戎援師閒道攻其後麀兵三日士不
疲礮石如雷萬山听誰信魚門蠱毒深大星同日歸烏
有時重慶總兵袁國璜由苗疆領兵至東鄉延安總兵
何元卿領兵從冉家壩土地壩轉出合兵老營巖同時
陣亡

高平祁恭恪年二十成進士官秋曹幾三十年至道光
甲申始外授河南糧鹽道己丑由黔藩入爲刑部侍郎

戊戌由粵撫拜大司寇之命鄧嶰筠贈詩所謂白雲舊
是迴翔地纔去曹司十五年也辛丑改粵督越三年卒
嘗上變通考試遴選真才一疏大意欲放唐宋制科爲
五目曰博通史鑑曰精熟韜鈴曰製器通算曰洞知陰
陽占候曰熟諳輿圖情形不分文武已未仕及攻舉業
與不果屬通才皆許以名上聞詳試錄用其鄉會試第
三場亦倣此五目略如元人經疑之式設問破格收之
議寢不行蓋在粵防夷籌海歐血酸辛知惟人才爲足
恃也兩莅廣南習其邦之善士海墻屯田之議刼自樊
昆吾獅子洋之議建自曾勉士集思廣益虛懷延納旣

采其議卽因而任之假以事權無掣肘之虞力排異議無傾軋之慮不費官帑一錢而事舉民悅沿海各鄉卹舉行團練土著良民爲七社輸成虎門諸臺二千三十有奇聽調五萬有奇御史田潤所奏三元里合殲夷匪一事卽其明徵其嘉慶甲子提學廣西所取多知名士陳蓮史方伯繼昌其尤著也

嘉慶四年正月八日成哲親王入直軍機處十月以本朝向無諸王在樞垣行走者正月初間因事務較繁暫令入直辦事但究與國家定制未符解機務姚子壽詩梁邸從容侍宴遊參差花萼倚高樓月斜漢帝蘭林豔

霜冷淮南桂樹幽井上桃生根易蠹道旁瓜覆蒂難收
東阿莫賦芝田館樂府新聲唱未休

王石臞先生與錢竹汀盧抱經邵二雲劉端臨有五君
子之目以河工漫口罷永定河道文簡公奉養京邸居
正陽門內西江米巷退食之暇以考訂經義爲承歡乙
酉重宴鹿鳴撰杖以待湯文端題其校書松菊園圖云
一代儒宗著述傳游思竹素養天全衛公好學忘年耄
章氏明經教子賢臺省文章開濟在丹鉛事業折衷先
後凋松與延齡菊老圃怡情鶴算縣林清之變有議加
培圓明園宮垣者文簡具疏切辨仁宗召見嘉納河

工工程名目歲修之外又有另案廳員率藉此自肥而
工反遜於舊石驪先生官河道六年所屬不報一另案
文簡習知其弊有請嚴禁東南兩河另案工程之奏得
旨允行官少宰時有議爲生祖母承重丁憂三年者
力持不可會奉使去持議者遽奏行之還朝疏陳庶祖
母非祖敵體不得以承重論緣情卽終身持服不足以
報罔極制禮則承重之義不能加於支庶請復治喪一
年舊例卒更正焉季子子蘭觀察壽同殉節鄂中謚忠

介

上元朱莊恪以御史出守鎮遠黃平州夷阿豹誘脅爲

盜土司告變單騎往捕令一役持牌書阿豹等五人名
呼其眾使禽獻餘不問苗相顧曰吾輩受此五人虐豈
可抗官五人皆就縛不戮一人謂人曰吾乘其無備也
數人鼓眾非真亂動兵則眾賊事起矣興義苗鬪大府
已勒兵曰苗爲民欺忿耳願以身保萬眾使開諭之果
服官至廣東巡撫癸巳引疾歸譚玉笙詩蕩析離居迭
報荒忽聞公竟辦歸裝君恩或冀酬他日民命何堪付
彼蒼再世韋皋原葛相君家朱邑祀桐鄉臨歧難掣如
鉛淚更爲哀鴻灑數行

特鑿亭官成都將軍時吳秋漁太守嘗下榻節齋病中

餽問繼至雪後席上句云隨意酒非求客醉撚髭人只

要吟安風雅可想辛未卒秋漁爲賦輓詞云門第崔盧

貴班行衛霍齊雄名孫破虜雅度祭征西乍落星如斗

長留氣吐霓銘旌高百尺萬目看新題善騎腰如鐵加

餐矢不遺病來難恃健數盡不關醫廡下頻年住牀隅

一面遲相看已無語握手但長噫多少無從涕淒涼灑

朔風謝權偏愛少懷德眾情同附載餘狂客

邵友四明人隨樞船

東扶藜走病翁飄飄旗尾白雲黯蜀江東

劉金門爲西研齋作龍江外紀序研齋藏有洪武鈔紙

復誌以詩云明初襲元制鈔法交子遺陌小貧則大一

準園府宜方郭中有范編埒同其規律令年月日幕背
官印施七載限納換斂散嚴常期是時議開創首贍軍
國資並行不罷鑄取濟銅冶虧萬方足筐篚四海無瘡
夷天龍地馬用流水頌京師至今寶鈔庫塵轍金陵達
士子幾心血元武湖之湄撫此見盛象簡易民罔欺片
楮五百年爛若貫朽爲反覆審工墨世或罕覲之多君
筦邊藏日戒錢神私篋貯絕銅臭抱牘清自知好事檢
故紙欲溯刀貝龜道古焉可廢蠹朽仍謹持

合河康氏茂園河督基田廣信太守基淵皆以進士縣
令起家蘭皋光祿以部員直軍機十年洊階京卿嘉慶

癸酉隨扈塞外取各省阨塞險要將弁能否所轄兵數
作小冊自隨適林清首亂 仁宗詢問當軸卽以其冊
進緣此受知由鴻儒出任皖藩歷四省巡撫少從黃東
井游其戲馬臺詩云霸氣曾聞冠九州五年王業付浮
漚荒臺此日誰調馬畫錦當時笑沐猴西望鴻溝迷舊
迹南來滹水咽寒流更尋謝客題詩處一體英雄又姓
劉和東井作也東井以揚郡丞罷官家居蘭皋爲刻詩
文歲時饋問不絕道光元年有旨查辦陋規奏寢其議
略謂以陋規入奏非政體若奏減其數其不減者官吏
皆將明目張膽視如廉俸其已減者且額必私增若遂

盡裁之則官不能堪反益病民李申者稱爲知體

江都史容莊司寇家本寒士室恆不舉火蔣太夫人以
鍼備易油父子一席讀甲辰 南巡薦赴召試囊十餘
錢薄暮無所投宿露坐田家石磨上自謂彼時心無所
慕臥觀星斗頗覺自適丁卯視學四川捐廉修成都考
棚以清嚴得士心前後主試三爲學政三累遷五部戊
戌請開缺摺有卅年京宦參養恩深僑寓京師家無半
畝語其送人之粵東作令云爲政先宜除害馬好官不
但飲廉泉非爲詭服以釣虛譽者比也

粵中弔鐘花生於鼎湖臘底將蕊山人伐其枝榦捆

載來羊城插置瓶中儼同枯枝春後花發爛若霞錦
花盡而抽其心舒爲綠葉王見大有詩詠之見大工畫
能爲尋丈大幅嘉慶五年嘗從趙李二冊使之琉球久
客嶺南老始歸杭居皮市與陳槎村善槎村爲王茨檐
詩弟子居槎渡村嘗爲見大談北郭遺事謂赤岸是宋
皇華館驛舊址北使至將迎於此自云聞之茨檐岸西
至大橋可十里而南五里至義橋卽槎渡村

張皋文說文諧聲譜手稿四冊又諧聲紀韻一冊上起
三代下逮漢魏惲子居嘗爲敘而未刻其書分古音爲
二十部精寫小篆細如刀幣文而以今楷書注諸家說

於下趙惠甫得之常州冊有成孫案云云籤乃皋文之
子也翁文恭師題云古音分廿部辨析至秋豪進退顧
江段縱橫詩易騷良書今魏晉精篆古泉刀云云成孫
字彥惟實卒成之凡五十卷儀徵相國序謂此書出韻
學可定足見未有韻書已前之本來部居其所著尙有
學算草太元述虞周易虞氏義疏均未成歿於登州府
幕英煥文太守爲殯斂其從妹孟緹詩所謂可憐身後
事多仗主人賢者也慶伯蒼嘗及其門

常熟吳謙兼山尊人官於楚殉苗難實戰死也當事僅
以疾聞久不得蔭引例就簿職其南旺湖紀事詩序湖

爲古大野地濱湖之民歲輸葦租於鉅野嘉祥二縣距城甚遠有司鮮至其地比年湖水稍涸人可徒行近湖之彭家營山家營處家寨苗家寨皆汶上縣所轄民多慄悍相結爲盜自春徂夏常白晝聚數百人持刀矛掠蘆葦必罄盡而後已事在鄰邑法每不及於是盜益熾民益貧且有識盜魁之姓名容貌而不敢言者嘉慶十六年春余量移鉅嘉主簿職在治河無緝捕責然往來湖上知之詳遂徧上大府書檄下汶上縣云云卑官而能以民間疾苦爲意者也兼山倜儻精吏事與查梅史

郭祥伯善

乾隆己酉康茂園總河以江甯方伯奉命防汛睢南通
周家樓暴漲上游魏家莊爲睢甯保障第十七段挑溜
大掃將陷上埽搶鑲方指揮間突然埽裂竹榿芻泥壓
公而下忽復急溜衝起撈救得生仍督夫下埽埽定而
隄成上流旣治不數日睢南水患悉平拜荷囊奶餅之
賜袁簡齋爲作睢南治河記沁渠者明袁應泰令河
內鑿太行爲五龍口放沁水灌田歲久湮塞癸卯茂園
官河北道力濬復之適連歲旱曠渠所及五縣無饑人
黃東升爲賦沁渠行比之唐温造之修復枋口焉嘉慶
癸酉重赴鹿鳴

錢竹初有秋空倚杖圖呂叔訥爲賦七古一章云一雨
忽已秋小住復掉舟來旣不可止去亦弗可留罍一微
塵礙如此傳舍中人逐驅使忽觀秋空倚杖圖自驚無
杖可倚爾慨焉溯支筇初地將毋同並操不律幾寸管
四大罕寄隻手空青藜漫追劉向步白藿輪吟庾亮賦
公子西池望雲鶴我猶東海隨煙霧卓哉拄杖不挂履
立錐有地悟元理獨從象象求生生子半天心隨所指
我頃尙未銷名心排纂三傳勞披尋唐阮春秋邦典久
佚志欲補成卅年
來未竣也就中正閨待參攷安得前席稽古今久期荷篠雲
歸岫杖有傳詩或相授能借半園之半又半區輔嗣易

成李嘉祐詩極雅澹無乾隆季年人習氣以廩貢宰贊
皇志稱其少時與稚存淵如西禾仲則味辛尙之有七
子之目然年輩較後間作繪事爲時所稱

山陰何小山綸錦以孝廉秉鐸金華有巢雲閣詩鈔野
店云炊煙緣屋立流水過橋分佳句也

鄧嶰筠中丞爲仲昭檢討六世孫由西安郡守超擢湖
北按察使國朝汪舟次而後一人耳由粵督移節兩江
以江甯人駐節會垣與史文靖隔府有閒實前此所未
有陳客曹其錕句云罕見典刑由郡守幾聞開府在家
園梅伯言書其在西安時決獄事云同州婺出其繼子

子無所歸訟至省公怒曰此逆子也當杖死繫柱石下
故久治他事而潛令人以茶餅給其子子奉母母怒不
食奉其叔叔食之至日暮公度其母見子儼然繫廷中
時時顧日影待斃也意且悔乃密呼其叔曰汝嫂癡人
耳汝試以我意語之汝撫六歲兒至娶婦婦死更娶勞
苦至矣顧信族人言我有好兒子爲汝嗣汝幼而撫者
不能子而顧能子長兒乎彼利汝財而嗣汝顧能孝養
汝乎汝死財與子皆族人有之卽汝何利必欲出子官
明日爲汝決無難也叔叩頭出明日母子來泣謝不復
言出子事蓋化訟而使其獄不成公聽訟往往如是公

抑抑不自言也

顧晴芬司農皋由修撰擢司業時名在第九戊寅以讀
學直上書房庚辰七月扈蹕熱河廿五日 仁宗崩而
是日辰刻 御筆已擢公詹事 宣宗卽位之次日與
學士徐頴同召見 上親執公手而大慟以 先帝眷
顧夙篤也性好竹家無錫城西與太湖近其先世居涇
上塋墓在九龍峰之陰柯山翼之中爲河莊俱有林泉
之勝久宦京朝欲歸營舊業不得作水竹柴門圖鄧嶰
筠題詩有云張涇明漪清絕底柯山蒼蒼接天起此君
把臂與要盟有田不歸如此水己丑致仕歸壬辰卒年

七十陳石士稱其詩詞字畫皆澤古與編輯秘殿珠林
石渠寶笈直懋勤殿得見內府珍藏畫益進 宣宗數
以扇紙命作畫以進焉

閩縣鄭青墅大令大謨爲少谷山人九世孫以進士宰
沁陽有治行教匪之亂保障著聲績朱石君嘗贈以詩
云巾扇登陣久練兵五年辛苦活蒼生論詩不廢琴三
弄折屐遙聞鶴數聲萬瓦曉煙人保障兩歧春秀麥縱
橫南陽召父重來日竹馬歡迎聽太平有十六洞天漫
稿多詠史之作張船山句氣蓋巖疆心磊落詩包全史

論縱橫謂此

詹麟飛懷嵩懋堂兩韭兩孝廉詩大戴經年注古經風
前小戴玉亭亭何當並奏鈞天樂議禮從容上 帝廷
兩韭觀察名嵩齡戴佳氏鐵冶亭尙書壻也與兄懋堂
並富藏書兩韭善書著有筆記其夫人亦工翰墨子慧
成號裕庭丙申進士不十年官至開府兩韭遂自東川
告歸裕庭善繪事夏慈仲有題所寫秋江紅樹詩

嘉慶庚申詹麟飛泊游於楚當事者援而止之接以士
相見之禮辛酉報罷之官楚北爲下吏有年來長揖軍
門慣此後雙鳧學鷺拳之句孫琴西爲袁篤臣墓表云
嘉道以來天下無事久吏治日趨於文達官大僚務貴

倨爲威重羣下望風而靡外官尤甚咸豐軍興吏道益
雜望彌輕體亦益卑自兩司至道府階級稍殊則儀制
異甚趨踰應對及班行次序苟毫髮有不合輒顏色立
變或羣齟齬之使不得出氣而後已於是輕儇者投隙
競進而欵奇磊落有志之士困矣篤臣以高科爲才郎
已而發往山東以知府候補在東數年以功得道員道
府皆四品而儀節殊異凡公事期集不同次舍由知府
得道員當綴兩司班後然必逡巡再三俟藩司再三請
乃敢卽次以爲謙讓有禮篤臣在府廳班久已鬱鬱及
是不俟藩司請徑入班坐藩司某深嘆之先爲道員者

亦愠遇事與齟齬而篤臣素氣甚好議論無所回避同
官益不喜所以陵折之萬方篤臣久始覺已無可如何
僂然處羣閥中益寂寥無與語云云足以見外吏之情
狀矣

陳稽亭工部撰明紀未成而卒孫克家續成之姚春木
詩所謂古來班馬有述作待子世學垂成篇也明宏治
中稽亭十一世祖都憲瓊與同縣吳文定寬王文恪鏊
常熟李文安傑吳江吳尚書洪並官京都公暇輒具酒
爲會爲五同謂同時同鄉同朝而又志同道同也文定
爲序諸人各有詩尙書屬越人丁衫寫爲圖各藏一本

陳氏所藏後燬于火嘉慶壬戌陳厚甫觀察鍾麟獲一
圖不知出自誰氏以歸稽亭稽亭爲跋復爲五贊以明
史止文定文恪有傳而三公事不甚著考之諸書皆當
劉瑾亂政之日以持正見擯凜然大節不獨文恪一人
而都憲及文定則已先沒云稽亭官京邸嘗乞同時諸
公題詠已已歸里法梧門送以詩卽題其桂門圖云君
學故有本通籍十四年忍飢爲文章裘敝囊無錢掉頭
返鄉里到及梅花先充棟五千卷負郭十畝田君性本
孤直辛苦全其天

嘉慶七年羅溪賊匪陳爛屐僭稱大號僞年號曰洪甯

有堂節相覺羅吉慶視師惠州降者縱歸令傳諭投誠
爛屐父赴大營乞降爛屐四竄千戶鍾桂擒以獻大軍
凱旋會永安賊徒復起乃駐兵循州以次剿捕已蕝事
矣以奏事紕繆削職對簿十二月惶遽自戕歸安吳瀾
崑源爲賦將星隕云沙場馬蕭蕭光弼韉藏刀不死軍
中死燕寢大星忽隕蒼天高昨日八州督今日登鬼籙
君不見馬革裹屍血糝糊自經溝瀆非丈夫至尊早知
臣謹慎臣不知兵佩將印南氛不靖臣無顏一死尙負
恩如山遺表手署督臣慶將死哀鳴達天聽嗚呼公之
功罪自分明不到蓋棺先論定有堂以侍郎厯撫山東

浙江素有廉名督粵伊始卽定西隆州苗獮之變在任
六年几榻蕭然渾如儒素撫臣瑚圖禮方爭柄爲所劫
持自以備位參知改囚服去僕從受吏隸詆訶謾罵有
辱國體遂取煙壺吞之逾時死那文毅查辦祇以輕生
上聞郭筠仙嘗言陰陽交爭聖人深戒督撫同城交爭
者二百餘年吏治人心安得不壞誠有慨乎其言之也
有堂官內閣時嘗以高麗墨一挺贈潘榕皋文曰翰林
風月至是榕皋賦望海潮一闋云森沈庭樹翩翩階蕊
濃香記試紅絲風月翰林溝瀆使節攜來周道倭遲珍
重故人貽念山雞雲鶴宿竝高枝雪爪萍蹤卅年春夢

總迷離松窗興寄臨池歎人亡物在欲見無期眞墨磨

人非人磨墨羊城往事難追鄰笛一聲悲漫閒濡筠管

悶靠烏皮譜入哀弦錯刀何處報相思朱梓廬題李訓導從軍圖有云

覺羅將軍文武略來莅師千人踊躍簡將驅先策後應龍里連等酋面縛盡收黔寨會黔軍千里永豐就平削

于役在丁歲更癸大樹飄零感今昨有堂之殞於非命當時皆悼惜之

春圃總制伍拉納之獄蔡葛山相國子告在籍於地方

大吏貪黷情事默不以聞降旨申飭春圃諸子俱謫

伊江石舫考功舒敏自幼能詩時甫弱冠與河間舒春

林令尹其紹相倡和摘習用之字搜探訓詁旁及子史

爲適齋字課越五年而歸歸五年而卒子崇恩刻其遺

稿四卷冬日書懷云雪擁柴門一尺餘問奇誰過子雲
居高堂尙恐荒於學寄語兒曹好讀書又見鄉書付雁
奴披衣燃燭淚糝糊親心怕惹兒心慟除卻平安一字
無年來如醉復如癡兩地心情脈脈思聞說雞竿春有
信承歡爲我話條支絕無聊賴學吟詩箇裏風情只自
知觸處拈毫腸欲斷原來最苦是鄉思湯文端稱其生
稟至性孝友誠摯時流露於篇什間

江都詩人朱冕老匏生前凌晨出坐村店嘗攜竹籃中
置筆硯索句曾遇一方外賞其奇氣出千金爲贈臨終
始屬其甥指臥榻下得金如數墓在上方寺東北歲久

墓平墓碣移作橋石壬戌冬許之翰袁承福過橋見石
字隱隱可數識江都詩人朱老匏之墓九字旁有宋學
濂詩遂購石易之越日復從土人詢得其墓所在乃歸
碣于墓而設祭焉金子青詩黯黯天涯最可憐離離芳
草滿風煙竹籃佳句多三百破屋遺金尙一千貧老到
來詩活命親朋盡處墓爲田傷心祇有橋頭石一掃青
苔淚涌泉

南昌萬梅皋廷蘭由壬申庶常歷宰懷柔獻縣乾隆丁
亥緣事落職禁錮十六年癸卯出獄回籍家有計樹園
校刻太平寰宇記成於甲寅刻十一經初學讀本成於

嘉慶丙辰丁卯卒年八十有九子承紀廉山初以副貢
佐姜度香幕官江蘇以承審壽州疑獄落職百文敏督
兩江網羅人才奏準捐復以承審劉第五案被議以訪
獲金宗有之徒方榮升得補海防丞調南河復爲琦靜
庵劾罷當嘉慶壬戌攝丹徒金子青寄以詩有云君言
無不盡君才無不爲君氣無不敢君識無不知相形見
優絀入俗非所宜於己任毀譽於人泯醜疵道在須臾
忍事當再三思可謂良友雲伯謂其待人以誠胸不設
城府往往以言語之失爲人所咎人或比之爲象言其
龐然行不避人觸跌人不及知或爲人竊其皮亦不知

也才略英特以當世事自任抑塞挫折不得遂其志以死爲足知其故矣

厲樊榭有丁卯復園送春詩戊辰題汪復園亭角尋詩圖詩錢唐汪抱璞廣文所居也乾隆甲子池上紅板橋新成牧牛行者爲之圖周穆門顧月田金繪卣許雪莊鄭璣尺厲太鴻丁敬身梁設林金壽門吳甌亭杭大宗魯秋旌釋焚虛篆玉崧亭祝豫堂錢坤一許若愚汪豐玉及抱璞皆卽席賦詩設林續賦八韻時山舟年甫冠替寫詩越六十年園廢圖歸海鹽吳思亭山舟爲題一律云板橋流水傍城闌此地曾經撰杖頻讀畫又逢今

甲子憑闌無復舊庚辛葭蒼露白思諸老臥柳殘楊少
過人贏得昔年詩句在一番童髻話前塵伊墨卿詩所
謂紅橋諸老落成詩此地今人或不知惟有白頭梁侍
講操觚曾記少年時也嘉慶辛未劉芙初題乳燕飛華
屋一闌云眼冷平泉路儘低徊舊家庭院昔年風露生
綠半灣紅一板占斷水亭煙渡算前輩風流無數五字
新詩同脫手讓山僧提挈盟鷗鷺珠唾落碧紗護吳郎
領略閑緇素說前游雪泥猶映劫灰都誤衰柳斷橋無
限好換了蟹汀魚步賸一卷傷心詞賦六十年來耆舊
傳怕磨人墨也從頭蠹伴歸權水天暮前後題詠者六

十餘人亦見乾嘉兩朝文物之盛矣趙谷林築春草園
與弟意林讀書其中有南華堂一房山泊花三十六鷗
亭諸勝嘉慶間松桂蒼然池館如故曾孫侍庵繪春草
園圖乞人題詠黃相圃謂昔趙子昂畫蘭或題曰近日
國香零落盡王孫芳草徧天涯子昂見詩遂絕筆今侍
庵重葺名園更繪香草可以一雪此言有詩云喬木依
然世德存鷗波亭畔憶王孫譜成天水族方大畫出國
香秋更繁江左有人摹雅集洛陽自古稱名園道元注
補聞重繡可許遺經借一翻收帆宦海世稱難高臥東
山獨謝安絲竹肯教兒輩覺樓臺直入畫圖看祝公玉

友承餘慶念我金昆發永歎卅載園中共攜手遺孤蕉
萃葛衣單謂從兄師栻四十年前嘗共游也

練川十二子後有楂溪四子亦王西泚光祿所選定也
諸迂辛明經玉衡程霞壇上舍芝筠李桂巖上舍景董
程霞江理問廷浩皆居南翔里迂辛異域歸帆圖爲霞
川題云渺焉滄海寄一粟匿跡菰蘆苦局促伊誰破浪
乘長風萬里揚帆縱遙目葉君厯落嶽崎人遵海而南
息水腹扶桑霽旭懸九枝樓臺隱見蛟龍伏郵籤一百
廿四更海中計里以百里爲一更自江蘇上海縣至呂
宋共一百二十四更計程一萬二千四百里

覆鼎東西

進呂宋口
兩山對峙

雲表矗百貨駢臻大庫中

中國洋
船貨寓

握槩懷鉛訪殊俗此日虛尋金豆枝當年釁起牛皮屋
故園回首白雲心異域勞歌黃鳥曲趁取東南舶趨風
布帆無恙歸途速搖珠散玉綴一編不數庭珪傳海錄
椰瓢載酒客所同鴻爪印泥君所獨彷彿乘槎銀漢還
茫茫海水搖空綠霞川名善鏞太倉人嘗出洋自呂宋
歸著有呂宋紀略

康熙中王方若修撰分修皇輿圖表院中卽事次顧書
宜韻云瀛洲亭畔淨階除匝帟槐枝亞碧蘆池面清風
迎散帙檐牙初日照繙書共知定本推前輩未敢傳鈔
付小胥東觀從容參典校駒駘載筆媿庸疏栖塵簾閣

喜新除秘冊駢羅几席虛周室職方傳舊志漢家年表
效橫書要從鞮鞞增圖籍豈爲華離問史胥理罷縹緲
方永晝垂鞭歸拂晚風疏丁亥汪文升嘗奉命纂修方
輿路程見所跋明本長安志嘉慶壬戌法時帆以講學
奉 詔考定輿圖房蘿圖薈萃編入宮史蘿圖薈萃者
爲南書房翰林前後兩次編集守土大臣所進山川疆
野各圖及異方殊域獻納各圖貼說裝爲卷冊不下萬
餘種時帆有詩云吾嘗纂宮史日侍輿圖房輿圖十萬
卷堆滿三間堂拓地九州外點筆銖黍旁辨說非一家
沿革甄綜詳紀其事也

秀水朱雲陸觀察鴻字儀可又字少梁嘗從宗人梓廬
先生學共撰杜律雙聲疊韻表由編修轉臺諫督糧湖
南不爲上官所喜謝病歸精九章八綫之學撰攷工記
車制參解次韻衍石古車行云車聲麟麟夜未央羣工
趨職爭材長造鳳樓手排鶴行嗟我鉛刀無寸銛秋蓬
輪轉隨風颺壯輓脫輓笑何常閉門無事尋有事賤工
惡能測良器無有爲用穀之利古徹猶存師其意豈將
員鑿納方柄但期菑蚤不齟戾大雅扶輪筆獨健許我
班門漫游衍畢竟虛車何所見古人不乘今人車今人
那並古人驅願隨君轡舞交衢其評程氏攷工創物小

記多所糾正

金蘭畦司寇近園在宣武門外米市胡同德清楊榦邨
司訓近園詩序云廳事之西地才數畝南爲曲池池上
列石數峰有亭曰攬暉南爲蓮池南舫池西迤北聚土
爲山山陰磬石爲洞曰嫫媿池東迤北面山爲紫雲山
房園最北爲葆春軒右爲寶儉齋左爲清玉山堂由嫫
媿洞入爲臥雲深處又南歷磴道爲誦芬書屋東出卽
南舫矣其文有云白雲乍飛深綠交暎一鳥幽啼鳴泉
細響皎月東出徐升林端微風始搖涼影忽墮彌望竹
石鬱然深沈儼坐絕壑奧衍無際至乃驟雨颯沓山溜

四下疏簾隔煙涼颼乍爽朝旭微暎蒼翠自溼山容林
容各發歡笑此甲子鄉舉後游京師作也潘文恭嘗延
課諸子爲參訂鏡古編諸書

山陰謝裕庵嘗於武林舊書肆買得寫詩零帙一張奕
光蘭佩東亭別集其鷓鴣詩汀柳暗時晴雨喚岸煙籠
處暮朝啼之句爲毛會侯所稱一方溥曉亭漱石軒近
詩有夢騎孤嶼亭前鶴詩寄雲林寺裏僧之句一桐城
方復齋配姚鳳翽梧岡賡噫集其女夢徵夢珠手書春
歸句云殷勤好把啼鴉屬休喚春歸喚客歸一無名氏
稿有客久宵無夢天寒雁有聲之句斷牋零楮中未始

無雋語可採

張芥航性剡張頗事豪舉逮督南河自奉穀薄值江湖
盛漲嘗省寮吏節省浮費嘗言南河閘壩始於靳文襄
公以分洩非常異漲之水非異漲則不開所以束水攻
沙也今則不漲亦開且非一處此下游所以迂墊也接
築海口乃徐心如河帥端特識並著有安瀾紀要迴瀾
紀要靳文襄治河書言百餘年後當可策馬而上雲臺
山今陶雲汀登雲臺山賦詩其言驗矣丙戌春督脈察
河病在中滿奏請于安東八套改河道入海庶漕艘利
而民害紓又力言減壩之不可開皆格不果行後雖創

爲灌塘之法以通漕運而河身太高淮水終不能出患
未已也癸巳引疾僦舍青門贈張介侯詩有云十載宣
防地褒彈任口碑天心定何許臣力竟難支聊作避賢
計甯貪招飲詩相逢呼負負媿說在官時曾不一年遽
捐賓客路閩生爲序二竹齋詩文鈔惜其不能行其所
願如靳文襄齊恪勤也

吳荷屋中丞書仿率更畫宗仲圭精鑒賞富收藏以御
史左官刑曹直樞廷除陝安道官至湖南巡撫以京堂
內召復授閩藩乙未吳菘甫以修撰典湖南試何道州
領解荷屋爲監臨己亥道州以編修典福建試菘甫以

宮允視閩學荷屋時官閩藩榜發小集藩署安民堂有

墨緣重聚之圖又為授經圖中坐者阮文達已與道州

左右侍坐以庚子致仕歸和黃霽青寄懷元韻云天涯

鴻跡記吾曾四十三年入客滕 聖主已容邱壑老路

人猶訝水雲僧重經鴛渚塵顏洗遠望蓬萊海氣澄時定

海用兵 多謝相招秋色裏衰遲杯酒恐難勝三吳游徧慰

餘齡水隔蒼茫兩洞庭欲游太湖未果五日從師過柳墅從芸師游

北固焦山遂千秋尚友證蘭亭樵定武襖序真本付吳門顧氏皇華驛

路如前日白髮門徒半曙星秃筆摧積吾老矣待君相

見好磨礪時公子春卿司馬尚忠需次吳門為留度夏

霽青寄詩有那待高秋涼冷候連宵扶杖夢支劓之句也

楊蓀圃孝廉與植長於三禮詩出入七子秦中秋懷有高閣曉寒瞻二華小樓疏雨夢三湘之句爲時所稱嘉慶戊辰五月卒於安化旅次歿後選瀏陽教諭鄧湘皋有詩弔之所謂匹馬曾從二華過曉寒疏雨落關河也并志其墓湘皋五君子詩云平生五千卷無補一日餓遂令雞棲車屢歲風塵堞蹉跎就選人倏忽歌楚些告身潤幽竈長物餘土銜其四人則孫白沙起棟吳建軒思樹吳蘭柴樗曾雲溪艾皆湘皋同里

三文敬公子世泰以侍衛兼佐領出爲四川參將累官
松潘總兵爲梧門祭酒壻詩曰詩龕甥館集王西驢司
馬所題也衛輝旅邸和壁間楊文叔韻云寒食初經雨
未乾蓬蓬春色馬頭看飛來紫氣秦關遠直上青天蜀
道難半夜月明添客思五更風冷怯衣單從來兒女原
多累幸接音書旅夢寒子二文都子京文璿子佩道光
庚子同榜舉人均能詩文兼工篆隸子佩寄成都舊交
十絕有云十年前事歎全非迴憶巴山願已違可惜梅
花三百樹春風依舊草堂歸猶記松州大合圍刀光劍
影雪霜輝一枝箭向天邊去射落山前野雉肥誠不媿

詩龕外孫也他若繼蓮龕方伯書得晉唐風味於近人

似劉文清武駿亭中丞工爲詩喜作擘窠大字綺園權

部文祥精詞曲能爲柳誠懸書皆老輩之雅爛文藝者

惠敏敬庵爲芝圃中丞先福兄工畫能詩未仕嘗爲梧

門畫扇梧門詩所謂敬庵間山多才儒雅風流耆舊者

也閩山謂明福甘肅同知大覺寺迤西地名響堂雙君居之亦與

梧門善嘗爲郡司馬謫官後以種竹疏泉爲樂與寺僧

契好喜書狂草世亦罕知之者梧門響堂訪友詩入門

無十步但覺雲滿衣過橋無一人惟見花亂飛古蘚澗

苔根久坐香微微清泉沁齒涼杏大朱櫻肥尤足見其

高致矣

虞山黃長源山人衍世居小山從婦翁馮補之游精篆
刻有六書探原五卷詩集六卷詩餘一卷論詩謂元遺
山謝客風容映古今發源誰似柳州深深得兩家之旨
模山範水邊幅易窮十首而後語意略同當擴之以沈
雄怪放離奇真兀之作杜韓是也王介甫教人學杜從
義山入真老眼無花留村孝廉瑞其孫也序山人集謂
趙秋谷以私淑門生拜鈍吟之墓何義門得馮氏之書
其學益堅教人學馮氏之學漁洋與秋谷蹟有違言漁
洋每詆誹馮氏以壓趙氏而馮氏之學不以有所毀議

而廢蓋有所受之也留村詩如多景樓遠眺云白雲如
奔濤隨風相馳騁一閃落江中青山出奇猛去鳥無停
飛歸帆有餘整王孫此來游詩題殊耿耿誰籌平南策
風鶴悲新警爲問謝安石蒼生何日靜枉下千秋淚諸
君固未省異代留前跡舉目懷風景落日下孤舟明河
映樓影以趙文敏詩平南籌策二句蓋有所感故詩中
及之與江鄭堂李濱石善辛酉鄉舉出煦齋協揆之門
歛縣汪萊孝嬰以通曉數學入國史館纂修天文時憲
忘旣成授石埭教諭石埭東南郭柳家梁有媪鬪田得
銅器二甌相附有古篆文孝嬰量得大者口徑今尺八

寸十分寸之九邊侈一寸十分寸之一腹寬底殺容積
寸二百三十六辨其當下篆爲蜀郡成都楊且造傳子
孫十字小者容積一百一十寸形與大者同辨其當下
篆爲陵陽子明受王孫釜作醜用沸十二字劉向列仙
傳紀子明上黃山采五石脂沸水而服此其沸石之器
且爲楊王孫名可補班氏漢書急分俸錢購得之嘗以
揚本屬黃謙牧題詠癸酉卒于官謙牧哭以詩有云生
平富學殖四部靡不研九數尤專家殫極彌方員盡通
中西蘊要眇窺其先著書四五冊突過千百編五分截
八線交錯見表全十物系三角遞兼得形聯兩積正相

等句絃相和連以是合三率梅丁未能宣三積互相較
長闊相和緣以是尋九容秦李猶乃愆謂所著衡齋算
學也焦里堂爲撰別傳

張叔未解元居禾中之新篁里以圖書金石自娛翁正
三爲書清儀閣額跋云此取漸上九王注也蓋與九三
同處上體而上九遠在爻位之外故象傳云不可亂正
以位外見漸之有序雖處清遠而非高尙物外之辭以
此注峩峩清遠合干注有儀可象是叔未名閣之義乎
嘗稱贄吳蘭陔門下讀書八銘樓有見遺像感賦云篋
劔囊書紀舊游海天風雨臥高樓九原隨會誰青眼卅

載侯芭已白頭賸有高文羸短褐可堪華屋竟山邱瓣
香低向南豐拜老淚爭教不重流具見性情之真其尊
人名鎮字芭野嘗分植淨相寺檣李數本因自號李亭
馮孟亭題楹帖云珍果擅名傳魯史仙根分種託儒家
馮秋鶴治爲繪仙根分種圖阮文達李鄒齋俱爲之題
子慶榮丙午領解父子解元亦自來所希有也

百文敏辦賊海上親指高雷西路賊匪二百廿人皆伏
法襄陽樊雲坪總戎獻粵海蕩平歌有云三聲衙鼓開
公堂軍門獻馘兵氣揚公曰元兇罪宜磔爰書懍懍嚴
秋霜百二十人賊黨與駢首就戮國憲彰是時觀者咸

股栗謂公威德宣遐方公曰降者皆免死吁嗟此亦吾
赤子彼獨身陷賊中耳孽非自作改則已聞者感歎降
者喜自此南人不反矣其詞甚美雲坪名雄楚有半畝
山房詩孫應棻亦工詩有祖風

富順李定堂榮安山館云課餘何事坐忘機領略山中
物理微初種瓜知緣樹上怒生筍不受籬圍晴檐鬥雀
爭蟲臂破罔懸蛛掠蝶衣鎮日幽棲無剝啄東鄰邀飲
叩柴扉頗有靜觀自得之趣句如別況略言都共喻新
詩欲述卻多忘忙雲引岫作飛勢亂石觸泉有怒聲皆
見清新王雪嶠謂其晚年家益貧而意氣不衰一日命

酒集知交懽飲爲詩數首談笑而逝蓋有道之士也

張亨甫揚州雜詩孟慈家世本通儒別我京華此月初
一憶當年廣陵對人間有子讀遺書孟慈幼孤愴至勤
學請益於王懷祖劉端臨段茂堂旣撰坎其先人之書
復屬屠琴隲系之以授經圖劉申受爲之記尤留心於
政治沿革得失官戶部最久道光丁亥蘇撫請以揚州
儀徵攔潮閘改駐新城增設羅泗閘孟慈謂揚關統轄
南北稅額有定分口小閘本易滋擾新城至郡僅四十
里若再增設重徵困民力主駁議載入則例辛丑發往
東河補懷慶知府丁未卒於官在部遵 聖訓會典則

例各官書創立新格擬史表之例仿耗羨之法區分有定欵有定數有定欵無定數無定欵無定數三等以觀出入之節提會要之領謂王制以三十年之通制國用者在此雍正二年命於畿輔近地瀕海有水利者行井田法遷無業旗人一夫授田百畝使治之福建司員主其事別置關防曰井田科時部奏催直隸熱河旗租自嘉慶元年以來未結四百餘案或應解花利或應追花利地價及估變各項其地畝或前經勘議入冊未曾取結到部或水冲沙壓地畝無存莊頭流亡孟慈爲主稿因議定查追章程或疏奏嚴飭清查或核準酌量豁免

當時曹司之精能者也

兩堂少宰恩普乙丑典會試得查梅史卷爲同事所抑
力爭不能得竟失第梅史感舊詩云仲翔處海濱學易
勝京氏尙苦知者無引爲國士恥文章肯徇俗刻覈求
其是長安看花人紛紛愛紅紫力爭公不能歎息尙滿
紙飛黃在路衢馬骨敢入市竟斬一面緣何況師弟子
呼嗟不祥金坐使大冶死爲少宰作也高陽寒夜被酒
雜書云弱水風迴船屢卻鈞天緣斷夢猶癡當時國士
無雙目頭白門生媿本師亦紀此事

朱梓廬稱查伯葵詩於磊砢英多中能時出清新朱青

湖亦謂其深造有得不肯寄人籬下如其爲人其論詩
大旨主乎消納嘗謂嚴滄浪香象渡河羚羊挂角只是
形容消納二字之妙世人不知以爲野狐禪金元以降
冗弱之病正坐不能消納耳又謂唐書元載傳胡椒八
百斛他物稱是舉小包大立竽表景神而明之存乎其
人與父積堂論詩絕句有云情人遙怨總蒼通毛女無
端出桂宮試向上清繙謫籍人間能幾李騰空注謂近
日才人愛傳佳俠彤管標榜幾至墮溷飄茵無非勢族
亦思詩禮之後安得如許飄墮者耶人心不古附會如
此風雅之罪人也所謂王夷甫諸人不得不任其責者

其隨園乎論詩絕句十二首寄琴隲云日下江湖未有
涯元輕白俗轉爭誇拈來楊柳依依句詩話權輿謝傳
家天人原不襲齊紈也要銖衣熨體安儻使嬌施俱裸
立路旁可愛一錢看漫道空靈是性情古人書亦性情
生縱橫筆陣圖中見韓信能將十萬兵落魄狂歌儘自
如大家風度在居諸歌姬院落韓熙載終異播間乞祭
餘杜陵何減九方歎深穩能傳上廐神一樣騰騫兩天
馬校他優劣不飛塵傳衣幾輩口頭甜北祖南宗亦可
嫌直待丹霞燒木佛知渠不是妙莊嚴雅俗甯從筆墨
爭江湖臺閣各崢嶸相公自愛閒籬落誰作雞鳴犬吠

聲力有千鈞句轉輕墨痕化盡妙心生游絲裊入秋空
裏只許呵毫一筆成異出同歸總入河路歧師友誤尤
多廣明結集聲聞藏迦葉尤訶突吉羅聒他老嫗太無
端滿耳盲弦託稗官彈得廣陵真絕調不愁聽少古衣
冠橫使才情誤後賢古詩不古強名篇太羹元酒無多
味枉費何曾十萬錢欲空理障託談諧惡趣偏言有好
懷我是侏儒未聞道漢廷無分學優俳青湖所評非妄
歎也

嘉慶丁卯商城程鶴樵中丞國仁典試秦中次年其子
小鶴家督復主試其地庶常例應散館後方准考差小

鶴以議敘未散館卽食編修俸得與考試偕往者爲姚
伯昂亦未散館先授職者皆異數也朱文定送小鶴詩
太華初迴豸使軒郎君新命擁朱幡鳴岐幾見將雛鳳
搏水猶留未化鯤織錦不教新樣改鑠廳應識舊巢痕
祇今盛事憑誰記錫貢璆琅萃一門

袁爽秋謂曾賓谷開校刻全唐文館吳山尊薦江子屏
入館書云無論鄭堂經史之學足備顧問卽下至吹竹
彈棋評骨董品瓷器煎胡桃油作鮮卑語無不色色精
妙足以娛貴人之耳目然南城卒不見收錄時嚴鐵橋
亦以不得入館負氣去撰全上古三代漢魏六朝文鈔

目錄收羅極富欲以壓倒唐文館其兀傲之氣不可及也而南城之好士概可見矣羲案鄭堂故善劒舞擊鼓諸技山尊所言猶未盡也余觀尺五樓集幕客行窮神盡相自國初以來其風氣已自如此其詩云秦時一坑坑不盡漢時屢錮錮何忍元祐黨籍半升沈斗牛之南萬里隕塞門嶺表任逍遙長鋏歸來吹短簫青衫書生悴敲扑紫騮兒郎傲漁樵黃金已盡頭未白匍匐長安爲幕客城外南音輒笑嘲城中卷舌難翻譯塵土棲遲年復年孔光潦倒就相憐八旗子弟怕行走識字來尋老伏虔登壇依然設几杖愛士非徒二簋享介弟昂

藏已賜貂親兒廕襲應披蟒折節身依硯席間東西指
授不辭艱孔壁舊文多脫簡宋儒餘唾半經刪主人不
得常謀面書札無情驅使便臺廝席地問之無俯首扶
拳教片片欲出城南訪舊游鄉書不見使人愁鮮衣美
食誇自得跨馬揚鞭任意投容子襟懷邁流俗得隴何
須望得蜀鍵關忽已厭金門走幣還思向牙纛一朝開
府領黃麻帳下才人違顧家未讀申商買條例不知鉤
股漫量沙亦從宰牧方城去尺素全憑四六語對偶初
調啟事中四聲莫辨題詩處遇主談諧任爾爲片言不
投何所之棧豆能捐慙伯樂賢路何妨悔叔疑巡行鵠

立堂皇側拜跪龍鍾僕隸色此時退食廢陳荆此時進
身困闡棘不如歸去山之隅齏鹽粗給驕妻孥蛇行蒲
伏免荼苦俯仰悠悠一丈夫杜少陵云束縛酬知己蹉
跎效小忠秦士之賤豈自今始然如吾鄉丁景行總制
巡撫湖南嘉興周文日國學政掌書記總制嘗問獄兩
可者如何文日曰罪疑惟輕總制極然之此類亦不無
補也

鄧元昭贈王茂衍詩稱年丈實丁亥同年黃石齋與喬
栢田天啟壬戌同年進士石齋與栢田手簡稱爲年兄
徐虹亭與潘次耕尺牘稱次耕年兄以同舉鴻博也黃

霽青謂今稱同年爲年幾兄須加行第若年兄之稱惟師長施之於弟子耳有詩云同年隨例合呼兄雁序今排一字明風會百年文質異後生休認作門生今制交夏令則換戴涼帽竹胎者用線緯籐胎以茜色染牛毛霽青草帽詩夏涼官帽別春影夕陽圓謂草帽亦稱涼帽名同實異也

黃霽青得古銅斧釜旁古篆文左一行曰卅二年右一行曰左郭有白絹包裹武虛谷題識云古兵器有銘者較少若秦時文字尤爲罕覯昔馮虛舟雅嗜金石游代州獲古銅斧於雁門山麓銘五言曰左郭卅二年古行

軍左右有局此殆左軍所用耶郭當是人名案建元以前無卅二年建元以後惟建武有之然字畫奇古不類東漢定爲秦器無疑案始皇本紀天下混一銷兵器在二十六年遣蒙恬將三十萬人代匈奴正在三十二年斯其明證矣潘壽生謂古篆文ナ卽今左字此篆工與ナ相去黍許不相連屬決非說文左卽佐秦時斷不以左爲左右之左大令以ナ工爲左字恐未確郭乃工之名禮所謂物勒工名者是也霽青秦斧歌六言勒銘在釜旁ナ工郭字鑄毫芒參用潘說也序謂以漢銅尺度之長四寸六分刃廣二寸上穿廣寸九分徑半之中深

四分許

錢衍石給諫閩游集爲己未庚申間所作前在京師詩
曾就正於朱籽廬併納卷中曉雨過嚴灘云畫眉無聲
蟻窗溼夢醒褰衣曉光入推篷起看雨滿江江氣銜山
寒欲吸寒山瑟瑟江沄沄山敲幄影江韉紋山腰碧葉
掩紅葉江上晴雲雜雨雲蒼茫卻露山半面風吹雨絲
山不見峰迴瀧轉雲繞身吟入井西之素練天光蕩水
無停姿斷簪插雲青參差輕鷗忽下渚田立微波不興
船行遲山川雲雨自蒸氣若釜炊熱氣上沸漁家笛家
居比鄰煙雨中中覲髣髴漁簑牧笠嘯雲冥江花過雨

聞微磬石壇峩峩百千尺終古不隕空江星相從何必
羊裘侶吾欲穿煙尋釣船少時篇什風格已成榕城冬
日句云晴島蒸疑雨冬花豔過春上仙霞嶺憩雨花庵
云梯連雲際青疇立石轉巖腰雪確春暮雲抱寺鐘聲
落曉霧開林麥氣香將至延平云側岸松篁飛雨過倚
山城郭夕陽高亦寫景佳句也嘗編友人贈答之作自
乾隆甲寅至道光甲辰五十年所得爲韞耽集罷官後
主講大梁書院最久刻有經苑

道光辛卯三月錢衍石生朝李次白贈詩云冥鴻欲飛
鶴無語但問青莖白幾許非朝非市非江村此間乍可

留爪痕庭柯昨夜長新翠東風促花花滿地相偕緩帶
傾清樽性不濃酒喜人醉十年前始從君游袞袞塵海
盟閒鷗我生與君同癸卯君才遠邁嵇伏流朝衫可典
琴可爨但有書讀百不憂松下科頭看流輩何者是憎
何者愛青蓮高踞五岳顛白雲獨卷六合內雜蟲得失
徒爾爲齒冷處仲唾壺碎盎然時養胸中春爾狐那屑
埋我輪門前殘客有幾箇朱李而外他無人酒盞纔歇
詩牋至坐消白晝亦快意笑矣乎名山日月無盡年著
書且就丁香前衍石議論醅正觀刻楮集示弟詩清約
慎密可與李詩相參證也詩云滕文悔馳馬自審苦不

足何況人子身躄步懍執玉小醉雷穿石大醉隄決瀆
稻梁汨水中其患中心腹旣醉或放言氣欲蓋山嶽談
笑失周防飲食致訟速三者皆至戒節制惟已獨笑子
性畏馬紅螺亦久覆不爲阮籍慎幾蹈嵇康戮石人摩
兜韃與爾日三復衍石書法龍蛇飛舞起止莫測見爾
士夫人家書其舟行烈風雷雨空中萬鏑介而馳蓬
底移牀漏不辭前岸何人迷止泊荒山疾走護嬰時自
是見道之言

宋岳倦翁棠湖詩稿凡宮詞一百首成於端平初元金
亡之歲時年五十有二感其猶子從軍於汴而歸追述

東京文物典章以寓宗周黍離之思者也世所傳玉楮集乃嘉熙戊戌以後作故開禧初經進百韻詩及此百篇者皆不入集棠湖卽唐李渤甘棠湖故址倦翁己亥初還故居詩元是廬山莫逆交宮亭湖畔著衡茅岳氏南渡後居今江西之德化其金陀坊則嘉泰間守樵李有別業存焉錢衍石考之綦詳河間紀氏疑爲厲樊榭諸家北宋雜事詩之遺稿而嫁名倦翁者列之存目誠武斷矣衍石配焯卿夫人爾士餘杭陳氏有閨門集禮婦職集聽松樓女訓之作卒於道光元年衍石類次遺文都爲一集其輯歷代后妃表成詩以落之云王政蘭

閨始注蘭林殿名故言蘭閨 蘭蔚宗后妃贊班政蘭閨 嬪風竹素貽二千年往

復三五月盈虧歷歷區賢佞悠悠迭盛衰帝皇權或假

紀傳體分歧虹電荒難問蘋蘩鑒在茲法宮明德冠內

德長孫垂孝養崇長樂訐謨下寶慈當熊樹奇節觀象

式清規秋扇班姬感春華左妹摛是家名不朽幾輩寵

忘危傍輦多憨態傾城詡豔姿流珠教記曲娥綠慣顰

眉縹緲芭蕉影蒼涼琥珀思鍼神工刺繡機絕妙牽絲

閱武堂楊柳涪州驛荔支簪留龍蕊貴袖拂鳳翼宜續

命琵琶奏迴波栲栳詞批章黃案側稱制白紗帷北第

捐絃誦東朝侈宴嬉杜娘空諍直董養任嗟咨銀鹿疇

能設倉鵬詎可醫鏡中希悟主方底忍埋兒色授應階
厲才升亦受疵由來通險謁終見覆邦基進退誠紛若
遭逢信有之焚椒冤太甚擣附獄誰治莫慰含飴幕徒
懷削脯悲宣仁滋謗牘顯肅誤歸期破碎瑤光錦凋殘
玉樹枝輿停過廟日刃脅渡河時紅葉飛無定瓊花落
已遲偷生甘事虜練行乞爲尼喪亂同漂梗徵祥恰驗
著鑄金胡弗就服赭類前知射卜屏門雀妖占產帳鴟
徽音猶示異靈澤孰修祠戚畹仍恩遇侯封各指撝園
林摹禁囿鼓角向邊陲沙麓潛成莽天元竟啟隋嬰蚡
爭艷奕珧濟等誅夷隆替如棊置愚蒙效管窺景濂編

未備遷史法堪師校寫晨披翰參詳夜熬脂張揚從辨
族宏本總傳疑諛頌刪劉毅簧言著郝隨蹟尋梁采女
貞闡蜀昭儀詳見本表末學縑緗隘旁行粉墨施武韋真倚
伏邢尹漫妍媸斷代興於漢何人化自岐寸心衡得失
還詠二南詩上下千古閨秀中僅見之作其詠唐太宗
句云高光大業何難及臧札清風奈不同較張商言待
到功高壓父兄之句尤爲含蓄

臨川湯茗孫中翰新疆詩八首云客有不知新疆者告
以回部八城識其大略各繫以詩喀什噶爾漢爲疏勒
國距京師一萬一千九百餘里所屬村莊凡三十有六

回首瑪哈特墨舊居城也初準噶爾強虐回部因其二
子大和卓木波羅泥都小和卓木霍集占乾隆二十二
年大軍平準定伊犁兩和卓木以八城迎降將軍班第
奏釋之以兵送歸喀什噶爾俾統其舊屬二十三年霍
集占與波羅泥都各據城叛諸城伯克皆響應將軍兆
惠明瑞以次討平之於是回疆諸城盡歸版圖矣回語
喀什爲各色噶爾爲磚房其地庶富多磚房故名後漢書
葉城唐書迦師城俱在葉爾羌漢爲莎車國距京師一
此我朝賜名恢武城
萬二千里回莊三十五處城距土岡有六門規模宏敞
甲於回部乾隆二十四年霍集占敗走舊伯克回民等

以城降葉爾謂地羌謂寬廣其地寬廣故名

南山起於葉爾羌之

杭阿山為北戒諸山之祖南包青海武功太白太乙太華皆其支派唐一行以三危為北戒之首非也歲貢

蘋果石榴將軍訥木禮爾參贊三泰遇害於此敕建雙義祠祀之和闐漢為于闐國距

京師一萬二千餘里凡城村六向受回首和卓木約束

乾隆二十年遣散秩大臣鄂對往撫之六城村伯克率

眾歸附二十四年霍集占來攻駐營哈喇哈什城外忽

黃霧彌漫人對面不相見我師乘霧急行既薄賊營賊

始驚潰竄去追奔數十里和闐復定和闐即古于闐之

轉音也

唐時於此建都督府今以辦事大臣駐之

阿克蘇漢為溫宿國距京

師一萬七百餘里城居高崖百餘丈四城連峙一大城

環其外洵天險也乾隆二十三年大兵旣克庫車阿克

蘇回眾聞風向化乃逐霍集占所置伯克以城降所屬

村莊凡三十有六阿克蘇以水得名阿克謂白蘇謂水

也兼轄拜城賽喇木城地濱木素爾郭勒南岸回語郭

積雪不消賽喇木城卽唐烏什爲漢尉頭國距京師

毗羅城拜城卽唐書阿悉城一萬九百里村莊凡十有一乾隆二十三年內附至三

十年二月伯克賴里木圖拉聚五百餘人四更縱火焚

掠副都統素誠死之賊遂據城爲變遣使求援於安集

延爲布魯特所獲縛而獻之將軍明瑞攻城數月不下

夜半以雲梯登城殲賊無算黎明振旅烏什復平烏什

卽烏赤山城居山上故以名焉庫車漢爲龜茲國距京師一萬餘里乾隆二十三年大兵追霍集占至此五月霍集占來援庫車我師敗之於託和鼎又敗之鄂根河獲其回纥殲賊數萬人霍集占以殘兵入庫車城七月復西遁越三月城降凡四莊九十七城庫謂此地車謂胥井也其地多胥井故名聖製託和鼎行狗喀喇沙爾漢爲焉耆國距京師九千餘里土田肥沃魚鹽蒲葦之利甲於他處所屬有布古爾庫爾勒二回城又有土爾扈特及和碩特游牧喀喇謂黑沙爾謂城年久黑色也南有羅爾淖爾爲古蒲昌海英吉沙爾漢爲依耐國舊屬喀什噶

爾今以領隊大臣駐劄所屬回莊九英吉謂新沙爾謂

城其城新建城故曰英吉沙爾

史稱依耐國最小東至莎車北至疏勒歲貢

蒲桃秋黎茗孫在閣進御文字多出其手此詩尤有關國故

己丑以失歡權貴移疾歸旋卒張亨甫過臨川作云君相有權難造命中年臥病故山秋飄零好句知多少落日荒城水自流舍人最爲曹文正所知首句乃其出都門句也

吳江邱璿潛甫閉門覓句與陳家心文學均喜疊韻信竺教家心族子三陞翊辰亦耽吟詠潛甫與訂忘年交翊辰以癸酉卒年二十七有評月樓遺詩三卷聞從兄

子玉將歸喜賦云至戚歸心原不少出門空手本來難
落葉云如何飄泊身無著猶是輕狂首不回大抵有性
靈而少蘊藉潛甫又稱吳用羹梅能文以孝行稱葉文
竹昉升有遺詩皆早卒惜天不假年以老其才也

阿文成得漢未央宮瓦略規琢爲研自征金川歸以貽
紀文達文達以貽伊墨卿吳清夫得於墨卿汪彝之得
於清夫嘉慶丙子彝之復舉以贈毛生甫硯周文達銘
爲墨卿隸生甫謂不類墨卿書抑其少時所作生甫從
惜抱游又習於李申耆包安吳頗得書家三昧次韻子
浚題孫虔禮草書景福殿石刻後云道衰藝亦輕雞烹

乃用鼎能者強鬼賊縛驥苦求騁岷源不知飲救渴恃
壘井誰爲泯險夷高浪曬秋景隸失闕醜邈草詭誤奇
迴空令子厚翁變法笑書永矇瞳萬象初神功獨君領
釁規出元化毛卵破飛隼舞獄迄書論斗捩精爽緊誰
知開闔中復此見淵靜風雷廓無質攫物輒摧猛藏虛
極汰沃瞻闕兆眈町雖然陶淬始何異幹劇綆截業積
微塵事豈獨豪穎長廊隱松鬣黝劓墨煤靖根柢默參
微妙壯足自省駁靈久懷充泉迸復思耿瀉閱芟儲鐘
明涵璞留礦固知擅體製未可盡精敏姑滋絹帛宛絨
秘夙同晒

董琴涵督糧國華爲吳下聞人由御史出守昭通錢心
梧詩所謂滇中有疑獄理外得其情傳頌達京師懷哉
吾董生者也在都嘗結宣南吟社兼工駢體文其竹巷
舊居圖記云昔者韋曲杜曲里以鼎族而分東灤西灤
川以名賢而著江左古巷游重王謝洛下老屋居思機
雲奉誠聞邃之悲平津車庫之感故宅文藻荒園竹林
猶復過之者裊裊弔之者歎邑矧乎敝廬風雨舊德未
沫先人釣遊陳迹斯在者哉秦郵竹巷夏君慈仲之祖
居也地濱淮堧湖通巖社篔簹千畝臺沼十弓寒碧浣
花之溪絲竹賭碁之墅禮堂帶草鄉名鄭公古徑蓬蒿

人傳蔣尉葛侯宅畔八百宰相之桑陶令門前五株先
生之柳亭榭暎若煙波渺然勝地冠於淮海高臺峨於
文游論衡云豐房知名家喬木知舊都斯之謂矣人代
變易門巷遷改滄桑三見劫換紅羊華表千年驚聞元
鶴平泉梓澤鞠爲茂草風流頓盡良可慨矣慈仲幼傷
趙孤感述祖德長爲齊贅僑居壻鄉不辭阮生之貧雅
敦許武之讓無田不祭有母倚閭風樹之泣當甚皋魚
負米之養恆嗟仲路每過故里悼心遺澤此則寶衛公
之故物祇益欷歔守范氏之硯田亟圖光復者矣永言
堂構託之畫圖他日者承華家衞振迹文苑贖羅含之

宅新庾信之園汝南之宗閱四世而彌盛通德之里得
小同而益章視夫朝登瑣闥夕遷潭屋傳舍邸第蔑忘
維桑餽粥歌哭若棄脫屣者宅心瀟敬豈惟淵霄景迹
揆衷足風積俗循覽歎慕敬成此詞

沈歸愚偕諸詞客集中吳廣歌堂賦舊邊詩與會者錢
唐沈方舟用濟長洲劉東郊震李客山果江甯孫丕文
謨主人則番禺方冀朔還東華朝昆弟也及成眾推冀
朔擅場嘉慶辛酉壬戌間歸安莫量萊君讀書于中表
陳鑾鎮衡后坊之魚計亭時鎮衡延姚樟笙華爲季弟
授經坊之東爲東溪會稽王直淵深甫夾溪而居月湖

楊炳堃蕉雨宅距溪一里而近烏程胡縉湘颿假館于此六人者唱酬無虛夕鎮衡駿卿深甫各成舊邊詩九章它如詠湖州唐詩人故址孟宅保孟東野舊居小敷山沈下賢故宅霽谿館杜牧之寓舍紫花瀨陸魯望別業皆關故實鎮衡錄爲蕢洲聞詠集三卷亦峴山雅集之遺韻也

歸安吳崑源爲眉庵侍郎族子好養生家言於黃帝六禁道德二經尤致意長興臧眉卿稱其詩得力於東坡遺山游歷公卿間頗自矜惜未嘗以此爲羔雁顧耕石題其集云橐筆崢嶸瞻氣麤半生載酒醉江湖本來官

閣無巢父豈謂詩壇有灌夫彈鋏誰憐游子瘦閉門且
學老禪枯何年同詣靈山頂稽首如來斷臂圖長汀上
官文佐手寫古人像及明開國勳臣像爲晚笑堂畫傳
崑源題其後云史有編年畫有譜能文善畫無兼長班
馬苦無寫生手荆關豈必工辭章古人已與不傳死空
勞想像如羹牆先生掀髯出奇想上追立本欺趙昌短
長肥瘦各殊態須眉宛爾來堂堂上自亭長狀隆準下
至十廟先徐常其餘詎止百十強緇衣黃冠次第詳餘
技兼收列女傳羅敷道蘊俱端莊蠅頭小字記誰某略
標梗概誌數行筆之削之寓于畫欲洗穢史流芬芳普

門開元遠擅場先生後起相頡頏師子出手便靈異何
況人物多輝光焚香盥手起再拜神妙不獨誇長康羣
公勳業付黃土委蛻一去天蒼涼何時翩然下大荒與
君揖讓鳴鏘鏘開卷讀畫如讀史廢書三歎悲滄桑
凌曉樓所著禮論攷辨精哲爲高密功臣又精公羊之
學爲春秋繁露注十七卷別爲公羊禮疏禮說問答等
書梅蘊生景州訪董子故里句畢竟廣川繁露學故鄉
箋注有吾徒甥劉孟瞻以淹通經史知名曉樓教也曉
樓卒遺孤毓端孟瞻收育之補諸生

萊陽趙太常崙順治戊戌進士康熙壬戌由禮部郎中

督學江南以清廉稱與陸清獻並爲于清端所薦士子
頌其德政有道南羣藻錄北嵐大令其五世孫也以乾
隆己酉舉人作令江南宰荆溪日以國山碑貽潘榕皋
旣卒榕皋爲題遺像云倚樓聲譽早年馳攜鶴家風寮
窠知藝苑驚傳鵬鳥賦州民猶詠毳衣詩高才不信身
留滯薄宦偏嗟命數奇我爲披圖頻墮淚虛堂重展國

山碑

榮第及亭辛未進士累官贊善以假詔案鑄職後改知
縣徐鐵孫畫梅贈之云暗香飛上墨花來含得清愁伴
月開借問長吟謫仙子夢中曾否憶瑤臺

王南陔鈕匪石於段懋堂之書皆有訂正徐謝山刺史
承慶亦著有說文段注匡謬嘉慶甲戌汪澣雲侍御爲
繪香雪海丙舍讀書圖陳玉方侍御題首玉方暨徐少
鶴侍郎皆有詩道光庚寅宋于廷爲錄舊句並紀一律
有相看未了平生事總爲叢殘一寸編之句張蓮民詩
云考亭四面白雲遮百本寒香倚屋斜華表鶴歸疑積
雪墓門僧老嬾看花經生著述誰千古前輩文章此一
家笑我常過楊子宅問奇載酒似侯芭十里晴巒擁翠
鬢飛泉聲裏掩柴關林鐘夜撼司徒廟笏屐春尋鄧尉
山經案丹黃書百卷篝燈風雨閣三間勞勞車馬天涯

路爭似巖阿歲月閒

沈鼎甫侍郎題葉兩垞刺史寶應政蹟冊云八徧熟繙
溫國史十年聽斷廣陵琴兩垞以甲戌庶常授完縣改
新喻起復選寶應捕蝗振災民被其澤移江陰擢泰州
卒於戊子肆力史學於通鑑曾覽八徧著紀元通考十
二卷其三國地理考未刊

涇縣趙星閣侍御青藜好奕與徐星友程蘭如施襄夏
范西屏前後奕皆受六七子琴士徵君其從孫也亦善
奕嘗介宣州梅石居謁袁簡齋於隨園從簡齋游者多
浮薄少年每見琴士布衣敝履陋於貌而拙於言則相

率吃吃然笑不止簡齋不能禁而又恐琴士之慙也曰
是涇川趙君善詩文而笑者不能止也又曰非獨詩文
也尤精於奕於是授几設枰皆向北以去向之笑者殷
然進而詢名字叩年齒矣所著通鑑注商於晉宋地理
尤精核其贈奕者任位南序謂天下有一定之品而不
可移易者惟奕爲然嘉慶十年涇人延洪穉存修邑志
穉存精於地理尤好引水經漢書地理志涇下韋昭注
曰涇水出蕪湖穉存曰韋昭誤也涇水出績溪縣徽嶺
山于漢初爲歙縣地蕪湖在涇下流正涇水入江之處
疑出字係入字之譌琴士謂水之源必自山出水旣出

山流行數十百里而或入河入江則必有所出之口稗
存謂涇水出徽嶺是也謂韋昭注出字爲入字之誤則
非也涇水出蕪湖入江耳不得云涇水入蕪湖也水經
言出字多有如韋昭意者如汾水出汾陽縣管涔山洞
渦水出沾縣北山下云西入于汾出晉水下口洛水出
下洛縣謹舉山下云又東北出散關南沔水出沮縣東
狼谷中下云與江合流又東過彭蠡澤又東北出居巢
縣南一水也前之所云出穉存之所謂出也後之所云
出韋昭之所謂出也昭何誤之有哉琴士博聞彊識固
不獨善奕也

呂月滄銅鼓聯吟集序云古者貢金三品銅其一焉惟
以之鑄幣鑄兵鑄律度量衡鑄禮器樂器而銅之稱實
始於秦自咸陽銷兵及兩漢之世數百年間銅器絕少
其見於史者不過銅人銅鳳銅龍銅駝銅甌之屬而後
漢郡國志中出銅之山僅有蜀郡之嚴道可知爾時銅
不易得故馬文淵於駱越獲銅鼓幸可改煎鑄馬式以
上卽銅柱之立藉以銷蠻中之銅使毋作戎器意其地
自產銅土人私采故志闕不載就范氏書推之則銅鼓
斷爲東漢以前物以唐六典考之則銅鼓爲南中所製
中原未必有之卽南康郡所獻志林稱其有銘亦非豫

章之南康也自六朝迄唐銅禁綦嚴故南中銅鼓或沈
之水或瘞之土後世乃往往發得其形製之狹而痺者
或後世所仿造不必秦漢間物要亦仿自元明以前而
不類近人之所爲自謂卽志乘所考者而繹之固質實
可信也

安康王松亭州判玉樹精小學著有說文拈字七卷成
于嘉慶甲子石門吳褫堂爲題松陰讀書圖云瑯琊之
裔雋才出恥與盧駱爭聲名裏糧日探藏書穴朝揚秦
碑暮漢碣精研部分僞體裁俗學紛紛皆臆說權輿隻
字通萬篇妙理一一珠貫穿博古者夸泥古死此中自

抱靈機圓綠陰一徑涼於水藉草爲茵石作几吟聲以外
悄無聞惟有松風徐入耳薄宦今來嶺海游朝朝手
版逐同儔故鄉山水樂復樂那不遠憶西北之高樓松
亭乾隆己酉拔貢也

陸祁孫稱劉海樹詩清於雲伯豔於梅史偶題云柔桑
春膩剪刀聲黃土牆敲蜩殼明紋是雨餘天更好夕陽
紅得可憐生紙鳶風緊峭寒侵細草如苔綠未深畫雨
畫晴都不是最難著筆是春陰官安徽十餘年能以禮
士愛民爲急癸未引對回潁州未幾卒祁孫惜其仕不
盡才

嘉慶己卯 仁宗六旬萬壽遣使致祭古帝陵寢明裔
襲侯爵朱毓瑞例不開列特旨命往祭告孝陵古昔待
勝朝無如此恩禮兼至者王簣山時攝甯藩得與陪祀
賦詩恭紀云落日荒荒白下門冬青幾樹黯朝昏唐陵
漢寢今仍在幾處清明見子孫

侯官林鑑塘編修春溥譔有竹柏山房九種三十六卷
最著者竹書紀年補證戰國編年陳頌南稱其事繫月
月繫日上參之皇甫謐帝王世紀劉歆三統厯貫串若
一癸巳甲午間嘗入三山吟社丙申閩中歲不熟輸粟
義倉倡其事賴活多人

家共白鷗三世住門多野竹四時秋海昌陸少白山人
句也吳查客嘗爲寫巒莊圖少白耽爲詩與查梅史南
廬二君善性疏放布衣葛屨傲岸自若逝後高東畹梓
其集彭甘亭爲之選定比之歸震川所稱之沈元朗
黎恂雪樓宰桐鄉修張考夫墓舉楊園願學備忘諸篇
謂邑士學程朱必似此真體實踐始免金谿姚江高
明之弊再出揀發雲南領運一起京銅舊例瀘州申報
船名夾歛漢陽申報船名川槩漢陽換載例限四十日
以原舟堅弗易也修艙豎桅併載而已故事運員竊官
銅多或至報沈失二三萬斤部費私橐皆出此雪樓曰

欺君事我不爲也自少至老好學不倦鄭子尹少從受業講詩法次子尹韻云閱世始知貧可賀承家未信老而傳與弟愷友愛撫教遺孤同己子庶昌最有名

寶山沈學淵夢塘弱而舉子鄉天性內隆才藻清麗長篇大什鏗鏘跌宕間爲詞令兼以醫名陸萊臧之官閩中招之往預修省志萊臧作來夢亭繪圖紀事前後游閩八年傾其士夫佐督學幕校藝諸郡有詩數十首興化云車螯蠟殼滿筠籃一路腥風到海南欲覓子魚三印大釣絲閒斂小姑潭泉山秀句當時體正字風流絕妙詞除卻玉溪生第一但應低首晚唐詩

黃滔徐寅皆郡人夾

溱草堂久寂寥祇留名字伴漁樵千秋卻怪亭林叟不

識拖柴堂下燒

夾溱草堂在廣業里堂前拖柴堂下燒漁仲自題草堂詩也亭林嘗不知通志

出處故有讀書不讀鄭夾溱之語

傳聞宋玉最風流醉墨清歌逐俊游

回首嚮城秋色裏夕陽紅上墊巾樓

宋比玉流寓吾邑與程孟陽李長蘅

交好所居名墊巾樓

永春云昭州刺史號書淫益席雄談滿座暗

恨不重刊十二帖遺書收徧古桃林

盛均字之才唐大中進士時皇甫煥

以博辯自雄均答應如響號為勃藪嘗病白氏六帖疏略因廣為十二帖仕至昭州刺史黃莘田詩所謂十二

帖銷無覓處祇應低首盛昭州是也永春在隋為桃林場盛有桃林場記

春愁褪盡海棠枝

腸斷東風謝女詩何似雙梳烏角髻年年繡佛買青絲

德化閨秀謝鳳姝詩有海棠褪盡少春枝句烏髻山有施氏女子成佛於此

不須峰翠奪柴

窯白土紅油淡淡描絕好春波樓上月碧雲無際聽瓷

簫德化出磁器有磁簫瑩白可喜聲尤淒朗見閩小記春波樓在縣門前界畫羅羅設色

眞七裏雲錦又翻新笑他拏出王郎畫手爪何如織素

人州出織紙畫香祖筆記引鈕玉樵云有王秋山者工爲拏畫於紙上用指甲細鍼拏出拏音築以手拏物

也近閩中有織畫乃破紙作條成之山水人物花鳥布寔設色種種臻妙眞絕技也漳州云蓮社

高賢不可招斜陽一角掩僧寮打鐘掃地風流盡詩版

無從問六朝唐咸通二年漳浦興教寺僧元慧錄古今詩作粉版藏於寺樓有宋沈懷遠顧野王

諸匡海蒼茫正荷戈北船曉挫暮猶多碧孃解唱平元

曲絕勝淒涼阿盞歌宋少帝覆舟匡山郡人陳格殉難前一夕作匡山六詠有北船曉挫

暮猶多句女兄碧孃作平元曲寄二弟略云虎頭將軍眼如電領兵夜渡龍舟堰良人腰懸大羽箭廣西略地

雪橋詩話餘集卷六

全求恕齋

匡西戰十年消息無鴻便一紙憑
誰寄春怨蓋其夫亦從軍匡海者
逃雨巖荒舊講堂從

無錦字怨朝陽春船一卷簪花格寫盡全家鐵石腸

巖在鄴山黃石齋先生講學處夫人蔡潤石玉卿當先

生督師出杉關時致札云自古忠貞不煩內顧身後之

事玉卿圖之善書代先生作行草幾奪真嘗偕北上舟

中臨衛夫人帖人爭以匹錦購之然皆署石齋名晚年

乃或破廟傾敝古道旁更無簫鼓賽蠶王鵝毛縫罽蕉

裁布閒卻猗猗陌上桑郡古稱蠶鄉詔安有蠶王廟今桑柘稀見矣天鵞絨蕉布其地

土汀州云淋漓翠墨挂紅籐倒薤絲絲露石棱般若高

臺銅鼓壁千年猶識李陽冰銅鼓山石壁有倒書千年二字大徑尺李陽冰篆與

福州般若臺稱雙絕古驛蕭蕭傍戰場秋墳猶唱鬱金堂不知巾

幘貽誰輩死媿明谿莘七孃歸化明谿有莘七孃五代時人從夫征討夫沒葬此

時人從夫征討夫沒葬此

時人從夫征討夫沒葬此

遂家焉谿旁有驛宋時有客假館夜聞吟聲淒惋聽之
乃七言古一章敘夫歿營葬事甚悉七孃累著靈異敕
封惠利夫人廟食茲土文文山提兵過此有
詩云男兒若不平妖亂死媿明谿莘七孃 農舍倉皇

尚枕戈蕭條風雨半山河不知黃柏聯吟夜可比零丁

涕淚多 黃柏洋在清流東五十里文文山行兵至此遇大風雨避入農舍與僚佐聯句隨身書

簾盡拋殘文士從來笑七官宰相不知衣鉢誤寓公猶

戴進賢冠 順治三年王師入閩明唐王自福州來奔猶以書簾數十自隨大兵追執於趙家塘明

大學士傅冠進賢人國亡家燬寓泰甯門人江亨龍家亨龍縛獻有司械至汀州死之 邵武云雁

翅羅紋拾道旁不須欵識覓香姜殘瓢烏阪荒城外春

草青青舊獵場 越王臺為無諸射獵之所時得古瓦狀如雁翅或如羅紋扣之作金石聲北平

山下舊有烏阪城越王六城之一也 江潭逐客悵何依泥馬成龍事已非

誰與招魂青海北上林一雁獨南飛

李忠定綱梁谿人先世居邵武後遷

謫來此又邵武人李微者陷金營嘗在冷山與洪皓相善曾道君崩五國城中國未之知皓為蠟書并求得韋

太后書命微潛行歸始得消息嶺隘干盤控百蠻蕭蕭落日下杉關兜

鏊氣盡毛錐禿誰話風流幕府山

楊凌颺張孟玟俱高才生為周櫟園所賞

識及周備兵時宴城樓適賊至周手一卮奉悍將魯雲龍使擊賊席未罷而魯已破賊歸楊為歌詩紀之楊死周悼以詩云文人薄命將軍死誰賊城南舊戰場邵春雙夾酒波温一寸紅冰

玉盃痕錯認羅家清似水邨醪休再祝南門

以酒釀酒曰雙夾邵

人多製之因名邵春色深紅如琥珀張孟玟閩酒曲所謂邨醪如水說南門者言其清澈到底也櫟園閩小記云予過邵武高主政崇穀餽酒淡而有致建甯云成佛與羅家錯認水無異閩酒當以此為第一

生天未可知峴亭碑碣共相思最難香火黎山廟供奉

騷人數卷詩唐李頻為建州刺史有惠政素愛梨山山水人以比羊祜峴山沒後立廟祀之屢著

靈應考亭舊舍接寒泉雲谷廬峰一脈傳底事麻沙書帙

盡更無神地夢娜嬛考亭在建陽城西五里朱子舊宅也寒泉精舍在崇泰里朱子葬母

於此因築舍其旁雲谷書院廬峰書院俱在崇泰里雲

谷即晦庵廬峰為蔡九峰講學處方輿勝覽載建甯麻

沙崇化兩坊產書號為圖書之府唐石山頭變姓名不

朱竹垞建陽詩恣讀麻沙里下書妨蹤蹟溷嚴平摩挲曾識橋亭硯留伴千秋玉帶生

建南門外朝天橋即謝疊山賣卜一條谿水界雲關驛路

處橋亭卜硯囊在京師見之恩恩又往還惟有晞真殘雪夢臥游未到武夷山

關在分水嶺大谿之源出焉李忠定嘗夢雪夜棹舟山川清

絕後謫閩南道經武夷至晞真館滿山積雪恍如夢游

海郁泰峰所刊卽刻宜稼堂叢書者也

嘉定陸子劭廣文珣詩學宋人嘗謂唐開寶間文士如
王摩詰于安祿山李太白于永王璘皆不能自免蕭文
元不見李林甫嚴拒永王璘託疾避安祿山粹然名節
一代完人唐史僅列文藝以文掩其行矣其謁文元祠
云右丞羈僞命太白脅彊藩獨有蕭夫子能令我道尊
他如贈莊子涵之官句云欲爲強項吏須作打包僧讀
史六言云灞陵山中棄藥富春江上披裘亦各行其志
耳何嘗傲睨王侯崔洪手弗執王玉衍口不言錢畢竟
清廉貪黷未必卽在其間語皆見道

朱鴻少梁題鄭喬阪七十小影云阿翁年七十猶復健
山行藥草尋應徧圖經輯又成別無江總宅豈有伯休
名愛此桄榔杖從來不入城喬阪名補居秀水新城鎮
與吳竹虛俱工詩以岐黃術名於鄉植品固窮詩多適
興之作與竹虛蹊徑稍異竹虛沒唐陶山刊其遺詩廿
五首所傳苦茶僧詩是也喬阪沒其從弟雪齋收拾遺
稿猶子照鏤版以傳和竹虛留飲云牆缺留花補林低
礙客行悼殤女云曾無寄寄三生夢獨憶稱稱五字詩
蔡鐵耕有子錫昌字小鐵頗嗜古助鐵耕校梁曜北古
今人表考援孔襄爲例證番君卽吳芮曜北采入庭立

記聞所集尸子與孫淵如初葉略同年二十六歿鐵耕
悼兒詩確證番君補梁考勤蒐尸子亞孫葉

蔡鐵耕肄業紫陽書院以課義爲錢宮詹所賞謹守繩
尺不苟取與晚歲意興寂寞以酒隕其生爲漢學所著
僅鉤考蔡氏月令一種門人爲刻借秋亭詩草七卷其
吳歛百絕自序謂貯謠諺於詩瓢寓規箴於笑柄效韓
氏歲華之紀拾范邨樂府之遺談吳俗者所必采也和
張五種菊灌菊詞云入秋望不到重陽珍重新開一半
黃我說君閒君未信三時只爲種花忙自從荒徑長肥
苗抱甕關心暮復朝一滴酒償一滴水枯腸也合百回

澆

宋干廷青溪雜詩水輒山温新爨弄星移月換舊陽秋
轉思河朔麤豪氣爲解江南宛轉愁自注謂三家文鈔
載汪鈍翁題壯悔堂集云朝宗游金陵挈數千金寓桃
葉渡日夜召故人善酒者挾伎縱飲治盤饌甚盛有膳
夫忤意搗殺之投尸秦淮水中時侯氏勢方張見者咋
舌不敢問又宋牧仲侯朝宗傳曰順治間河南撫軍廉
知方域豪橫將按治先文康公言之而止兩家文所言
如此則後孔東塘譜桃花扇傳奇頗言朝宗風流蘊藉
蓋綴飾後鈍翁自刻文集刪去此篇亦爲朝宗諱也

安溪李文貞故第在珠市口西柳樹井宣溪歐陽侍御
厚均觀政農曹移寓其處庭懸 聖祖御書夾輔高風
賜額猶存御史少從羅慎齋游慎齋主講嶽麓年逾九
齡嘉慶丁卯重赴鹿鳴著有周易今文尙書詩經春秋
管見頗多憑臆虛造爲孟瓶庵所痛詆侍御在臺省建
白皆關大計年逾強仕卽告養歸繼主講席各二十有
七年道光丙戌其太恭人五世同堂康蘭皋中丞奏請
旌表元日試筆句云曾元繞膝娛慈母伉儷同心有老
妻亦佳話也

鞠烈女者泰州人父徐五贅於鞠人以鞠五呼之鞠五

蚤死無男有女子四長次並適人三女贅同邑曹先爲妻其四烈女依母與第三姊同居州城北門外有運鹽壩先爲人量鹽家稍饒烈女年將二十有姿先屢調之必正色拒有問字者先輒中撓因循數載嘉慶己卯歲六月烈女在竈下先裸裎至出其私以示女女掩面怒馮走訴母與第三姊皆若不知遂往告告兩姊家其前後鄰里具審其事並來責其母與其姊爲曹先妻者乃迎女還一日不食至曉門未闔女室閭如次日爲七月朔始得屍於橋下巨舟往來一臂已斷其母愚婦人里長亦不以鳴於官宋于廷時官州學作詩紀之以爲一

弱女子耳必有所仰望而後可以自存既無父兄又無所天一室之間旦夕爲無賴子所逼徒一死以明志是則可謂烈矣

宋于廷嘗疑明許某所得泰山刻石殘字爲宋代重摹之本至江鄰幾劉跂所見者已剝蝕殆盡卽今嶽頂之無字碑今存秦瑯琊刻石其形制與無字碑相類宋文鑑載劉跂泰山篆譜序言石之尺度形制亦略同蓋自秦至宋已約略有字自宋至明剝蝕當盡且集古錄言石頑不可鐫鑿今傳舊拓本泰山刻石廿九字後有許某跋語數行字尙工整非不可鐫鑿者知非元石矣道

光甲申洪小筠瞻墉依泰山刻石殘字字樣摹絳帖所載全文重刻于廷有詩云玉女池邊火乍焚羣公議論久紛紜竊疑莒國留殘字難信秦人尙舊文八體署書精點畫一家考古識權斤早從金石添新識恐與斯翁了不分同時吳雪峰亦嘗摹刻一本

施愚山後裔不振旣葬被人發冢棄骨賣棺并斂時所服青金石朝頂亦轉賣先生在京師有寄姬人珠淵家書其卷向藏其家後亦轉至他姓珠淵廣陵徐氏年十六歸先生亦能詩事詳集中宋于廷聞張竹谿揆談愚山先生軼事詩云著作誰能步後塵衣冠猶可想先民

纔知地域周官法料有詩書發冢人同時尺牘皆名手
記客鳩茲展巨編往日添香憶紅袖家書一卷落誰邊
丁亥七月于廷過蕪湖何廣文家見愚山朋舊尺牘凡
十大冊也

宋于廷歷官泰州學正旌德訓導同時沈小宛官甯國
校官于廷贈小宛句云與君一樣成無用何必文章說
滿家陸祁孫詩有江北儒官甲天下周金沈宋俱絕倫
之句周謂保緒金謂江陰金皋曙洲也于廷戊子新年
遣興云約勒清任意披尋故舊書江湖時共慰臺省已
全疏後起多輕薄新知怕齟齬尙堪邀瘦沈商略和圍

居小宛有乞歸之意

天晴登鹿塔風緊敝羔裘難使遙心接何

能遠目收煙雲紛幻景草樹動離愁不盡憑欄意仙人

渺十洲其鹿塔詩序云旌德縣訓導官舍有浮圖五級

乾隆三年重脩學宮遂并建此土人題爲文昌塔案魏

書釋老志曰凡宮塔制度猶依天竺舊狀而重構之從

一級至五三七九世人相承謂之浮圖或云佛圖晉世

洛中佛圖有四十二所又案唐釋元應妙法蓮華經音

義曰塔此譯云廟或云方墳又曰案塔字諸書所無唯

葛洪字苑云塔佛堂也又案徐楚金說文新附字曰塔

西域浮屠也據此諸文則塔字見佛經非儒家者流所

宜用也故六代以來凡藏佛經舍利及薶僧骨乃始建塔今以訓士之官而居桑門之舍若夫文昌天星爲祀典所載非釋氏所崇此皆當時造者無識以成斯謬然其將近百年難議改作五月上旬有鹿自外來登五級而墮昔唐貞觀初於慈恩寺造塔見雁飛墮地遂名雁塔佛說雁犢鹿爲三淨食則雁與鹿類也余於文昌之名疑爲不辭適有得鹿之事易其名爲鹿塔考長安志知雁塔之制初唯五層今復同此且以祝縣之人士以文詞奮迹不絕將踵唐人故事題名云云小宛寄于廷詩言學舍不當有佛刹蓋亦鄙造者之無識也于廷次

韻解之云得鹿擬成精舍記來鴻始覺滿城秋冷官無
事登高眺遠意未始不以爲宜

旌德姚仲虞配中周易姚氏學初名周易疏證包季懷

嘗爲作序季懷歿後其家始以遺藁寄仲虞

季懷爲慎伯弟丙戌

歿於揚州旅次慎伯爲撰行狀刻其毛詩禮證行世

于廷論易一首贈仲虞云姚

生手韋編問我到官宅疏通見逸象編纂漸盈尺其中

正覃覃幾人窮隱蹟之宋得坤乾歸藏理先闢孟京所

流傳可見東觀迹

湯東觀在洛見書說

卦氣與納甲千載誰蹈隙

彖象斯根株卦爻足紬繹聖人語中庸不肯示奇僻象

辭及變遷觀玩知順逆非常可怪論下學恐無益所以

十二篇人人飫膏液微言豈容顯秘書不輕獲深憂墮
微茫非是相吝惜反教存卜肆時復付賈客堪興建除
家陳數猶古昔濫觴遂滔滔星宿源誰摘若待百世下
學者嬗茲脈還采周秦文證合盡冰釋從此鄉壁言不
得與假借生乎實後起使我手加額仲虞又撰有月令
通論書學拾遺自言經學之外惟好琴書書依慎伯法
於琴得古百衲撰琴學兩卷

涇胡時棟孝廉爲墨莊給諫從孫世與梅文穆家有連
遂寓宣城丙子出湯文端之門慧心好學年二十六卒
有杏軒集八卷包慎伯稱其駢文才氣滔滔不絕每於

窄處能寬險處能平山城行云山城荒荒大如斗健兒
三五抱關守統統譙鼓傳初更葳蕤魚鑰重門扃巧借
重門索阿堵咄哉健兒猛于虎夜中兩客異縣來倉卒
難待雞鳴開一客投錢入城去一客囊空健兒怒霜風
刮面更漏長枕藉枯草痛欲僵健兒得錢沽酒酌短狐
拜月女牆角案嘉定鎮江志有云城郭關扃之設所以
嚴邦守杜姦萌諸軍出入自便啟閉非時所謂限中外
戢奸暴謹譏征者寢弛無禁蓋自古歎之矣

山西浮山貧瘠僻在山中不通轍跡國初以來未有出
車之事乾隆四十五年班禪入朝所用車馬猥多襄陵

故協濟霍州其年襄霍皆被旱災力不能辦始議令翼
城浮山量爲資助自後雖非災年凡過兵轉餉輒與其
事非舊章也道光十年夏慈仲攝浮山縣事值西陲不
靖上將出師以霍州山路崎嶇車馬當增一倍按察使
飛符飭翼襄浮三縣各出車二十兩馬十六匹協濟其
役慈仲以翼襄地近孔道民物殷阜此縣去霍二百餘
里間井蕭條山程險阻與彼兩縣不同詳述始末於臺
司抗牘再三乃減其數如用協濟車十兩則襄陵出其
五翼城三浮山二馬亦如之閱六月而議始定所爲兵
車行云縣僻少人行城荒無軌道飛符一夜下臺司不

信山中有徵調我縣何所有蹇驢與犢車驅逐田里間
未曾歷長途蹇驢一日行百里犢車七十里而止將軍
銜命犒西師晝夜兼程焉用此我驛況已裁車馬從何
來羽書迫促不得已比戶搜括奚爲哉翼城自有車襄
陵尤多馬我縣民貧出其下調發居然視翼城令下經
旬無議者一馬之費二萬錢一車之費數十千和願從
來隔鄰縣白飯青芻都不賤里正前致辭小民力已疲
安得開山作平地使馬與車無不利安得縮地傍通衢
使車接軫馬育駒我意殊不爾但願從今不見邊塵起
牽爾車驅爾驢春納稅秋完租年年賴耕作爾曹勿復

愁臉削鄰縣之民終歲勞通塗那及山中樂以有驛州
縣皆有里下供差襄翼雖無驛亦然惟浮山無之兵差
一過卽宴然終之以慰藉之詞也顧南雅以爲得陳民
疾苦之意

山右阨邊關設兩鎮故事巡撫閒歲而徧閱之由汾州
至河東謂之南閱由忻州至歸化謂之北閱道光二十
三年當北閱榮城梁心芳中丞夢涵先期告所屬公館
毋用地衣每飯魚菽而已從行者二人餒其餘善飲能
盡一石不亂行部以甕自隨有進盛饌者卻之肩輿行
烈日中或請障以縑帷亦不御夏慈仲謂官并冀十年

所見州縣供張以華侈相尙漿酒藿肉土木被文繡殫
竭財貨而莫之敢卹幸而有以清約著聞者而迎謁之
際往往意氣沮喪若不克展布其才焉中丞所過城市
民不知役前此所未有也登州詩人岳賡廷石卹遺集
在晉爲敘而刊之移滇南旋復引退其清修人鮮知之
者

伊文敏辛酉通籍用國子學正出爲雲南通判道光戊
戌以雲貴總督協辦大學士辛丑調兩江以經理浙江
軍務不協革遣尋起廣州將軍卒年七十二嘗言天下
無好做之官作官無有行樂之日旣登此場認定苦中

之趣方是真諦在滇謂邊民最淳易治又最愚易惑亦
閱歷有得之言也子小山孝廉桂恩能詩文枝山比部
桂榮工指頭畫

文敏爲睿忠親王後人
良弼資臣其裔孫也

浦江周筠雲作詩瓌麗有奇句阿鏡潭應鱗夙與知雅
筠雲客歿於武昌鏡潭時令南昌爲刻遺詩數百首毛
生甫贈鏡潭詩略云周君古畸人詩歌鬱瑰異惜哉嘔
心肝徒飽鼠齧笥家隨羈旅傾詩與坎坷備浮生羹未
熟江浪咽寒吹先生賞神駿氣結追計吏逝水增深懷
遺編爲序次窮通久易交友道半子棄豈其風雨夕更
慰九京意銅盤應鐘響歎息到枯瘁融文搜昔亡譚論

續初墜

秦芝軒尙書以乾隆庚辰登第有芝產於庭錢坤一宗伯爲作圖同人唱和有瑞芝堂集陳芝楣中丞爲尙書壻嘉慶庚辰甥館棠樹又茁一芝中丞以是年第二人及第黃左田尙書爲作棠芝圖中丞爲諸生時入百文敏兩江幕府道光己亥以蘇撫權江督薨於位馮柳東挽詩云淒涼薦士牘歎息活民書嘗於江夏仿范文正法置義田 成皇帝御書義莊扁額賜焉雍正丙午長洲彭氏香櫟樹下產靈芝明年芝庭尙書以第一人及第張天飛爲畫靈芝卷乾隆己丑元和陳詠庭觀察初

哲廷對第一先有重臺桂之瑞僧童心爲作重臺桂圖
皆科名佳話也

德清俞瀾花孝廉鴻漸詠古詩素王起闕里卓爲萬古
宗究之聖人聖不越庸行庸事兄嗟未能感與事父同
想見生前愛一室常融融卽今祭用丁諸賢靡不從伯
氏猶未及冥漠能無恫巍巍啟聖祠典祀春秋崇曷增
配享位永永垂無窮其後巾山先生奏請聖兄孟皮配
享崇德祠承先志也

績溪方雪蓮元泰爲茶山廉使次子嘉慶乙亥以都轉
判官奉檄山左文登畢九水稱其詩清雄俊逸能深

古人之意與九水夜坐述懷句云湖海生才原不易文章知己故應難性情蕭曠未補官卽謝養歸道光辛丑有感送弟石湖云極目風煙動遠愁卻看身世兩沈浮天巖鼓角江城晚日冷旌旗海國秋衛足葵知霜雪苦隨陽雁爲稻梁謀淮南米貴親朋盡乘興還爲汗漫游寂寥終歲子雲居望古情深入世疏欲借長風翔鸚鵡問誰尺水辨龍魚飄搖未卜三椽屋慷慨難陳一字書虛此百年成底用白頭江上獨踟躕時英人不靖未嘗無用世之志也

郭蘭石大理每以徹夜之功臨醴泉銘一過典試者四

督學者一由史職歷清要隆隆嚮用道光壬辰由四川
學使歸年四十有八鬚鬢盡白 宣宗諭以爾年老故
亟用汝大理具奏年歲如狀竟以是年卒其吳修齡圍
鑪詩話書後謂其論古韻殊昧昧又數言平水韻不知
劉淵乃書估竊金源王氏書也又自宋以後獨推馮班
以繼唐人亦爲偏見然標舉以意爲主之說足以箴李
何王李之借面弔喪讀香奩詩調冬郎感在身世前人
所未道及者閻百詩述修齡自負與載酒園詩話鈍吟
雜錄爲三絕其高自標置如此當時趙秋谷取其釀米
爲酒之說近袁子才襲其說尤多云云評泊極允翁古

端詩非非想本自天開一卷談龍足辨才米釀酒成花
釀蜜箇中三昧孰參來此說固自顛撲不破也

陳忠烈邦彥所居在順德錦巖山下自號巖野其雪聲
堂遺硯譜所謂蕉葉白而錯以青華冰紋硯下署佩
蘭二字佩蘭者梁藥亭與公子恭尹及屈翁山稱嶺南
三家者也背有銘云鬱勃者何忠義氣黯黹者何家國
淚我爲銘之永勿壞款識東吳後學惠士奇嘉慶甲戌
三月唐威恪得之穗垣時其尊人方卸清遠事夢巖野
先生來以手撫其肩曰有心愛物適在君家幸好收藏
蓋先生於永厯時殉節清遠也威恪遂以夢硯名齋曰

當令吾不媿此石卒以咸豐壬子死金口之難鄭子尹
編播雅已定特以公詩終之

薩湘林鈕祜祿氏以孝廉起家由長沙太守累官戶部
侍郎署西安將軍謚恪僖素工八法所至刻石草書尤
凌紙怪發丁未帥伊犁拓伊吾司馬侯猗碑百本翟文
泉所未見也何媛妻詩玉碣先傳巴里坤天山題字近
知聞裴岑肅穆侯猗縱奇氣俱應媿孟文

平涼王孝女名素貞六歲父亡女以鍼黹養母終身不
嫁截髮以誓母歿具斂營葬越七日而自經嘉慶丙寅
事也女善琴每哭母烏必集於庭海昌陳受笙爲作慈

烏吟馮勺園復作烏雛曲云嘒嘒查查恥求牡烏頭縱
白尙無偶辛勤作女不作婦百年休入他人室有巢笑
爾鶉鳩拙嘒嘒查查兩翼孤老烏失食呼其雛霜鳴雪
啄尾畢逋白蓮水邊得食喜能養何須八九子查查嘒
嘒飛上下老烏已死稚烏苦白楊蕭蕭烏自語朝啼暮
啼誓不雙風飄雨泊羞鴛鴦查查嘒嘒來聽琴朝飛一
曲傷我心梁上朱絲烏畢命魂兮歸來鮑姑墳平涼人
拜孝烏村常州楊孝女無兄弟製刮絨花以養母母歿
喪葬旣畢而死無錫唐孝女素居惠山之鱸塘工畫花
木母亡賣畫以養父矢志不嫁年七十而終勺園皆有

詩紀之

沈鼎甫侍郎辛未分校林文忠出其門視學湖北刻程
畏齋讀書分年日程羅整庵困知記祝人齋淑艾錄汪
雙池讀近思錄儒先晤語視學安徽刻張楊園年譜陳
確庵聖學入門書方子春生齋讀易日識陸桴亭思辨
錄輯要陳東塾謂其承陸清獻之餘風純乎朱子之學
少受業於段懋堂又精通經學不爲心性之空談嘗言
典章制度與夫聲音訓詁文字之學必宗漢人道光乙
未卓文端單文恪典試江南時陶文毅方爲總制林文
忠巡撫監臨龔文恭上科主試時官江蘇學政侍郎由

皖赴江甯考試錄遺與文端文毅文恭皆同年而文恪
文忠皆其門下士故事江甯府署大堂舉入闈筵宴禮
考官督撫學政皆與焉文毅爲繪乙未入簾圖各賦詩
以誌良會侍郎詩有云乍喜苔岑聯臭味居然香火有
因緣藝林傳爲佳話

西域哈什河經石色微黝高六寸廣一尺厚寸五分形
略如梭一面刻番字佛經徐星伯從塞外攜歸凡七枚
云得諸哈什河以一贈陳扶雅胡書農謂哈什河屬漢
烏孫地疑爲漢刻漢時烏孫屢上書且馮夫人嫁以能
史書爲諸國敬信非不嫻漢文者則此刻又疑在漢以

前陳扶雅謂是唐古忒所書綽霍勒贊旦經彼中累石
爲主以祀神謂之鄂博因刻經石上其說得諸喇嘛據
此當爲元刻矣元代西域悉隸版圖所設官領以國師
號令至與詔敕並重皇慶中命國師繙譯諸梵經典凡
諸番朝貢表牋文字無能識者皆令譯進豈此石亦出
當時國師所譯吳臞翁詩有云獮質外磊砢詭製中雕
鑿將毋戒殺蠶鍬石女手搽于闐王女刻石約母殺蠶抑爲祀鄂博
刀劓神所監亦謂鄂博或刻經其上也

唐四潛邸高祖曰通義宮貞觀元年改爲興聖尼寺太
宗曰太安宮初居承乾殿武德五年高祖以秦王有克

定功建此居之在禁中東西引渭水環之本名宏義宮
以太上皇徙居改名太安睿宗曰咸宜觀在南親仁坊
元宗曰興慶宮龍首渠西南流經此南宋四潛邸阜陵
曰佑聖觀殿旁規室爲小學壁間御題富貴必從勤苦
得男兒須讀五車書杜句茂陵曰開元宮在秘書省之
左元爲行中書省今布政司是也穆陵曰龍翔宮在後
市街紹陵曰宗陽宮本德壽宮後圍咸淳四年築迄宋
亡纔十年度宗撝亭名別是一家春非佳識也東軒吟
社嘗以命題費曉樓爲汪小米作東軒吟社圖圖中凡
廿七人杭州汪劔秋弒秀水莊芝階仲芳杭州黃薌泉

士珣項蓮生鴻祚餘杭嚴鷗盟燕杭州汪小米遠孫高
爽泉塏諸秋士嘉樂吳仲雲振械夏松如之盛汪覺所
阜胡書農敬鄒栗園志初趙雲門雩龔蘭齋麗正陽湖
趙季由學轍歸安張仲甫應昌武進湯雨生貽汾杭州
陳扶雅善錢蕙窗師曾汪又村迨孫嘉興張叔未廷濟
杭州汪少洪邁孫南屏釋松光了義海昌吳子律衡曉
樓亦自貌焉吟社中尙有杭州孫與人同元永嘉梁久
竹子恩杭州張仲雅雲璩姚古芬伊憲周南卿三燮李
西齋堂於甲午作圖以前下世故未載其最爲老壽者
仲雲尙書仲甫中翰

黃香鐵舍人詩寫景最工巖灘遇雨云千峰縮入雲一
雲飛入水水亦化作煙雨乃橫江駛我舟冒雨入身在
雲水裏歸牛浮鼻過淋漓溼其耳來帆兩三葉一白迷
尺咫江昏雨益猛急浪掣船尾舟過楊柳青云城根日
色作旱瘦絲絲慘綠垂河檉高駝如山影在地馱煤歸
去搖空鈴

林文忠年二十舉甲子鄉榜就旁邑記室百文敏以故
督左官汀漳龍道物色得之爲延譽於歸安張蘭渚中
丞遂招入幕始知名生平持論以爲交際啟事以通情
款親切函札從不假手於人文書中有佳牘必詢其幕

客姓名籍記而揄揚之僚吏稟牘寫作佳者每親自批
答圈點付還曰寒士緣此增重官吏亦緣此加意佐治
人才非瑣屑也士有一言一事之可錄者必詳籍之名
夾袋錄李文恭以舉人充鄂藩書啟從陶文毅知其詞
翰託人聘之已會試得館選沈濤園題文忠與沈鼎甫
司空手札有云平生重師友款曲擅書記後起賞長源
落星追邕桂謂此蘭渚中丞乾隆庚戌館選先以召試
中書入直樞垣者久多舊聞精吏治開府福建文忠相
從幕府五年因盡識先朝掌故及六曹事例因革然非
見賞於文敏不及此遠謫伊犁勘辦開墾事宜由將軍

布彥泰據此奏記以入告方事之始飭成員悉聽調遣
訂闢各路屯田三萬七千餘頃歲省腹地撥帑數百萬
金 宣宗嘉勉奏非林某不克臻此又未嘗不歎將軍
之賢也將軍字子謙善畫文忠有題子謙將軍畫山水
四絕句云淡煙籠水綠楊灣雨後青浮隔岸山樹底誰
家結茅屋得魚沽酒掉船還疏林黃葉露山村曲磴蒼
苔印屐痕欲訪種松高士宅碧雲深處不知門松風謾
謾溜泠泠細草微黃老樹青尋到斷崖泉落處有人石
上倚雲聽薄海遮山石徑荒園林昨夜半凝霜憑闌愛
看丹楓豔小閣捲簾留夕陽其乙巳伊江被命回京紀

恩述懷四首之三云大樹營門禮數寬將軍揖客有南
冠非徒范叔褌袍贈不待馮驩劔鋏彈夙世因緣成締
合一心推挽媿衰殘格登山色伊江水回首依依勒馬
看

武康徐雪廬孤貧成學阮文達序其詩舉楊園先生幼
受業于其母母告之曰孔孟祇兩家無父兒也是以旣
長而得戡山之傳以雪廬行誼文筆莫不知爲賢母之
子其哀慈烏三首爲母劬勞病噎夜聞烏聲作也牆頭
烏夜啼月落繁星淒我有白頭母臥病在庭幃青燈無
光山氣溼呻吟似與烏相答孤兒躑躅愁不眠仰看北

斗吞聲泣落葉隨飄風何年再上枝烏啼一何苦終夜
聲淒悲爾能反哺尙如此我獨輕身走千里歸來母子
相對啼淚滴牀前一杯水長繩繫白日挂在桑榆顛一
烏將兩雛骨肉難棄捐烏啼啞啞口流血寒夜聞聲腸
斷絕一息光陰勝百年羽毛零落荒山雪妻素心平湖
陸氏亦能詩有嬰蘭堂集四卷三十一歲而歿雪廬甲
子舉於鄉公車北上攜子金鏡寄養邵子兩家爲寄巢
篇云獨鳥引雛飛樹頭鳴不止遊子去故鄉攜兒適千
里兒寒誰與衣兒飢誰與食哀此失母禽奮飛無羽翼
兄弟雖同氣不如朋友親眾草雖焜黃不如蘭蕙春單

車綠槐阪落日長安遠
旅宿驛程勞夢與兒同飯
兒生何不辰墮地卽異鄉
有父遠行邁征馬元以黃
別父兒弗悲無母兒弗苦
海上有朝暉春風日吹女
浮雲異南北出門心暗傷
願爲雙黃雀銜泥集君堂
所謂善言其所難言者也
尤長於駢體文謝周越亭
贈鑿金帽頂啟云乘雲天
上采得金星馳馬林間飛
來柘彈銅荷琢粟釘寶座
之螺珠花腦承跗貫丹房
之兔膽開函震魄渾疑丹
鳳銜來啟篋驚心直訝火
龍擎出惟帝王不相襲禮
故名器不以假人某南塾
塾巾西山采蔞騎驢射策
何時席帽離身仰屋著書
未見鷓冠成集忽三英之
賁

及欣什襲之頒來詩詠如星易稱元吉顧頭顱而獨笑
自慙白蠟明經念簪笠而弗忘長憶青霞居士文達嘗
示以縮字藏句法舉庾子山羔獻冰開桐華萍合等句
爲例譙於曝書亭者十五人嘉興丁子復張廷濟楊蟠
李遇孫秀水虞光祖李穀陳本立海鹽吳東發沈三祝
陳石華嘉善孫鳳起平湖朱爲弼石門吳曾貫桐鄉蔡
鑾金以報檄雪廬來自前溪且出其十臺詩序傳眠焉
齊梅麓通天官家言嘗製中星儀自動渾儀二器並爲
之說又仿泰西水法造龍尾恆升二車精妙入微其用
一車當翻車之五人一當十林文忠試之塘寬十畝深

二尺厚乾七寸纜三刻許其龍尾車歌云入繩附臬螺
絲旋繚繞往復成迴川兩頭空洞桶底脫半腰約束環
中圓張芥航贈句云竭來聚散何頻數老去精神尤矍
鑠研北陳編尙苦披泰西奇器還能作與黃靈青同出
陳玉方之門爲書在米董間

筠溪都統常德最精國書掌儀制司時倡議合滿漢同
官並序前後輩禮部漢官之序前後輩王文簡春曹儀
式尙無此稱後始漢人自爲序而滿人不與合滿漢同
人論前後輩自筠溪始時嘉慶乙亥丙子間也又續立
春曹題名扁屬梁茵林輯題名錄茵林詩所謂能增南

省重獨熟上清書者是已未幾出守畿輔洊至浙藩入
爲太常卒於江甯副都統任同時桂文端裕靖節富海
帆保禹言薩湘林皆出自春曹極一時之盛焉

松陵朱逢泰柳橋善鑒別古人真蹟以其暇自爲之有
畫石軒詩集四卷臥游隨錄四卷所見題畫詩如查二
瞻云萬疊青山有一邨鶴蹤鹿迹滿柴門莫放書聲出
山去世人還解識桃源梅耦長云朝來秋暑酷無端夢
想深林面急湍持贈吳淞江畔客青門不換舊漁竿楊
子鶴云長松獨立未嫌孤肯與雲泉入畫圖除卻疏梅
與修竹別尋知己料應無百尺寒濤萬壑風竒姿犖犖

與誰同湛園流水羅浮月不負平生
在箇中王石谷云
暗谷層巖霧不開灘聲樹色滿庭隈
墨池應有潛蛟起
忽見晴窗風雨來姜學在云谿上
茆堂晝不關青楓赤
赤碧梧殘道人何處采芝去惟有
野雲時往還清雋多
可誦者

乍浦副都統西凌阿從子景順妻瓜爾佳氏爲福州協
領烏爾袞女嘉慶乙亥景順隨父入都中道得疾就醫
至乍浦歿於統軍官舍喪歸福州柩未至家書先達婦
偵知之投繯逝年二十一平湖方子春詩鳳邱山峩峩
鼇江水瀾瀾水流石不轉婦心亦如此詠其事也

雪橋詩話餘集卷第六

雪橋詩話餘集卷六

覓求恕齋